

II SHREE VITRAAGAAYA NAMAH II



UPPANEIVĀ
VIGAMEIVĀ
DHUVEIVĀ

अंतगडं दशांग सुत्तं
ANTAGADA DAŚĀṄGA SŪTRA

पंचम गणधर सिरि सुहम्मसामी विरइयं

अंतगडदसाओ

अंतगड दशांग सुत्तं

ANTAGAḌA DAŚĀṄGA SŪTRA

मूल पाठ

Ardhamāgadhī Aphorisms

अंग आगम – ८

8th AṄGA ĀGAMA

Bhagwan Mahāvīra's Precepts

Sūtra First Composed By Fifth Gaṇadhara

ŚRĪ SUDHARMĀ SWĀMĪ

Vallabhi Council (Synod) Chair

DEVARDDHIGAṆĪ KṢAMAŚRAMANA

Published By

GLOBAL JAIN AAGAM MISSION

अंतगडदसाओ
अंतगड दशांग सुत्तं
ANTAGADA DAŚĀNGA SŪTRA

First eBook Edition (PDF) – 2012

Source of Ardhamāgadhī Aphorisms:
GURUPRAN AAGAM BATRISI (Aagam Series)
(Gujarati 2nd Edition, 2009)
Published on the Occasion of 100th Birth Anniversary of
SAURASHTRA KESHARI GURUDEV
PUJYA SHREE PRANLALJI M. S.

Text in “Mangal (Unicode)” Font

Published By:
GLOBAL JAIN AAGAM MISSION
C/o. Pawandham, Mahavir Nagar,
Kandivali (W), Mumbai - 400 067
Tel.: +91 92233 14335, e-mail : info@jainaagam.org
www.jainaagam.org / www.parasdham.org

GLOBAL JAIN AAGAM MISSION

Promoting Compassionate and Nonviolent Living

MISSION:

Global Jain Aagam Mission promotes the eternal truths of Jain *Āgama* (precepts of Lord Mahāvīra) to build a compassionate and nonviolent lifestyle in the world.

GOALS AND OBJECTIVES:

- Translate all Jain *Āgamas* (scriptures) into English and other world languages
- Make *Āgamas* available in all electronic forms
- Promote awareness of *Āgama* throughout the world
- Educate and uphold Jain way of life using expertise of social media
- Promote a compassionate and nonviolent lifestyle throughout the world
- Encourage and promote research on *Āgamas* to develop approaches to the world challenges (ecology & environment, global warming, world peace, psychology, health, scientific principles, etc.)
- Hold periodic conventions to promote exchanges among world's scholars
- Interface with interreligious organizations and other guiding institutions
- Be a resource for information and referral
- Work co-operatively with local, regional, national, and global organizations

TRANSLATION OF JAIN AAGAMAS INTO ENGLISH:

The Global Jain Aagam Mission has embarked on a project to translate and publish all Jain *Āgamas* into English. The English translation of the *Āgama* will help youth of today in India and abroad to learn and understand Lord Mahāvīra's preachings. The goal is to reach every household and every person in the world to impart the wisdom of the *Āgamas*. In a non-sectarian way, this Mission will endeavor to deliver the Lord Mahāvīra's message to hearts of the people. The translated *Āgamas* will be distributed to various libraries, universities and Jain institutions within our country and abroad. In addition, it will be made available on the Internet and in electronic forms of eBooks, etc. Many learned intellectuals from different countries and cultures have supported this project of translating the *Āgama's* into English. The work is being performed in cities of Mumbai, Ahmedabad, Bangalore, Shravanbelgola, Delhi, Jaipur, Chennai, Kolkata, Banaras, Ladnu, Dubai, and USA. In addition, this mission is receiving guidance and blessings from spiritual leaders of various religious traditions.

INVITATION TO PARTICIPATE:

We invite scholars, spiritual aspirants and *shrāvakas* to join us in making this mission a success. Your contribution of knowledge, time, and money will be appreciated.

Please contact by email at info@jainaagam.org or by phone to:

Girish Shah at Tel. +91-92233-14335 or Gunvant Barvalia at Tel. +91-98202-15542

विषय सूची - Table of Content

पढमो वग्गो.....	3
पढमं अज्झयणं.....	3
गोयमे	3
२-१० अज्झयणाणि.....	6
बीओ वग्गो.....	6
१-८ अज्झयणाणि.....	6
तइओ वग्गो.....	6
१-६ अज्झयणाणि.....	6
अणीयसकुमाराइ.....	6
सत्तमं अज्झयणं.....	8
अट्ठमं अज्झयणं.....	9
गयसकुमाले.....	9
९-१३ अज्झयणाणि.....	23
सुमुहादिकुमारा.....	23
चउत्थं वग्गो.....	24
१-१० अज्झयणाणि.....	24
जालिपभिइ कुमारा.....	24
पंचमं वग्गो.....	25
पढमं अज्झयणं.....	25
पउमावई	25
२-१० अज्झयणाणि.....	28
गोरिपभिइ.....	28
छट्ठो वग्गो.....	29
१-२ अज्झयणाणि.....	29
मकाई-किंकमे.....	29
तइअं अज्झयणं.....	29
मोगगरपाणी.....	29
४-१४ अज्झयणाणि.....	35
कासवादि	35
पण्णरसमं अज्झयणं.....	35
अइमुत्तेकुमारे.....	35
सोलसमं अज्झयणं.....	37
अलक्के	37
सत्तमो वग्गो.....	38
१-१३ अज्झयणाणि.....	38
णंदादि	38
अट्ठमो वग्गो.....	39
पढमं अज्झयणं.....	39
काली	39
बीअं अज्झयणं.....	42
सुकाली	42
तइअं अज्झयणं.....	42
महाकाली	42
चउत्थं अज्झयणं.....	43
कण्हा	43
पंचमं अज्झयणं.....	44

सुकण्हा	44
छट्ठ अज्झयणं	45
महाकण्हा	45
सत्तमं अज्झयणं	46
वीरकण्हा	46
अट्ठमं अज्झयणं	47
रामकण्हा	47
णवमं अज्झयणं	48
पिउसेणकण्हा	48
दसमं अज्झयणं	50
महासेणकण्हा	50
परिसेसो	51
॥अंतगडं सुत्तं समत्तं ॥	51

पढमो वग्गो

पढमं अज्झयणं

गोयमे

- १ तेणं कालेणं तेणं समएणं चंपा णामं णयरी । पुण्णभद्वे चेइए- वण्णओ । तेणं कालेणं तेणं समएणं अज्जसुहम्मं समोसरिए । परिसा णिग्गया । धम्मो कहिओ । परिसा जामेव दिसिं पाउब्भूया तामेव दिसिं पडिगया । तेणं कालेणं तेणं समएणं अज्जसुहम्मस्स अंतेवासी अज्ज जंबू णामं अणगारे कासवगोत्तेणं सत्तुस्सेहे समचउरंस संठाणसंठिए वज्जरिसहणारायसंघयणे कणयपुलयणिहसपम्हगोरे उग्गतवे दित्ततवे तत्ततवे महातवे ओराले घोरे घोरगुणे घोरतवस्सी घोरबंभचेरवासी उच्छूढ सरीरे संखित्तविउलतेयलेस्से अज्ज सुहम्मस्स थेरस्स अदूरसामंते उड्डंजाणू अहोसिरे झाणकोट्ठोवगए संजमेणं तवसा अप्पाणं भावेमाणे विहरइ ।
- २ तए णं से अज्ज जंबू णामं अणगारे जायसड्ढे जायसंसए जायकोउहल्ले, संजायसड्ढे संजायसंसए संजायकोउहल्ले, उप्पण्णसड्ढे उप्पण्णसंसए उप्पण्ण- कोउहल्ले, समुप्पण्णसड्ढे समुप्पण्णसंसए समुप्पण्णकोउहल्ले उट्ठाए उट्ठेइ, उट्ठाए उट्ठित्ता जेणामेव अज्जसुहम्मं थेरे तेणामेव उवागच्छइ, उवागच्छित्ता अज्ज सुहम्मं थेरे तिक्खुत्तो आयाहिणं पयाहिणं करेइ, करेत्ता वंदइ णमंसइ, वंदित्ता णमंसित्ता अज्जसुहम्मस्स थेरस्स णच्चासण्णे णाइदूरे सुस्सूसमाणे णमंसमाणे अभिमुहं पंजलिउडे विणएणं पज्जुवासमाणे एवं वयासी-
- ३ जइ णं भंते ! समणेणं भगवया महावीरेणं आइगरेणं, तित्थगरेणं, सयं संबुद्धेणं, पुरिसुत्तमेणं, पुरिससीहेणं, पुरिसवरपुंडरीएणं, पुरिसवर- गंधहत्थिणा, लोगुत्तमेणं लोगणाहेणं, लोगहिएणं, लोगपईवेणं, लोगपज्जोयगरेणं, अभयदएणं, चक्खुदएणं मग्गदएणं, सरणदएणं, जीवदएणं, बोहिदएणं, धम्मदएणं, धम्मदेसएणं, धम्मणायगेणं, धम्मसारहिणा, धम्म वर-चाउरंत-चक्कवट्ठिणा, दीवोताणं-सरण-गइ-पइट्ठाणेणं, अपडियहय- वर-णाण-दंसण-धरेणं, वियट्ठुत्तमेणं, जिणेणं, जावएणं, तिण्णेणं, तारएणं, बुद्धेणं, बोहएणं मुत्तेणं, मोयगेणं, सव्वण्णेणं सव्वदरिसिणा, सिव-मयल- मरुय-मणंत-मक्खय-मव्वाबाह मपुणरावत्तयं सिद्धि गइ-णाम धेयं ठाणं संपत्तेणं, सत्तमस्स अंगस्स उवासगदसाणं अयमद्वे पण्णत्ते, अट्ठमस्स णं भंते ! अंगस्स अंतगडदसाणं समणेणं जाव संपत्तेणं के अट्ठे पण्णत्ते? एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता।
- ४ जइ णं भंते ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता, पढमस्स णं भंते ! वग्गस्स अंतगडदसाणं समणेणं भगवया महावीरेणं जाव संपत्तेणं कइ अज्झयणा पण्णत्ता ?
- एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता, तं जहा-

गोयम-समुद्ध-सागर, गंभीरे चेव होइ थिमिए य ।

अयले कंपिल्ले खलु, अक्खोभ-पसेणइ-विण्हू ॥

५

जइ णं भंते ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता । पढमस्स णं भंते ! अज्झयणस्स अंतगडदसाणं समणेणं भगवया महावीरेणं जाव संपत्तेणं के अट्ठे पण्णत्ते?

एवं खलु जंबू ! तेणं कालेणं तेणं समएणं बारवई णामं णयरी होत्था । दुवालसजोयणायामा, णव-जोयण-वित्थिण्णा, धणवइ-मइ-णिम्माया, चामीकर-पागारा, णाणामणि पंचवण्ण-कविसीसगमंडिया, सुरम्मा, अलकापुरी-संकासा, पमुदिय-पक्कीलिया पच्चक्खं देवलोगभूया पासादीया दरिसणिज्जा अभिरूवा पडिरूवा ।

तीसेणं बारवईए णयरीए बहिया उत्तरपुरत्थिमे दिसीभाए एत्थ णं रेवयए णामं पव्वए होत्था । तत्थणं रेवयए पव्वए णंदणवणे णामं उज्जाणे होत्था । वण्णओ । सुरप्पिए णामं जक्खायतणे होत्था, पोराणे, से णं एगेणं वणसंडेणं सव्वओ समंता संपरिक्खित्ते, असोगवरपायवे ।

६

तत्थ णं बारवईए णयरीए कण्हे णामं वासुदेवे राया परिवसइ । रायवण्णओ ।

से णं तत्थ समुद्विजयपामोकखाणं दसण्हं दसाराणं बलदेवपामोकखाणं पंचण्हं महावीराणं, पज्जुण्णपामोकखाणं अद्दुट्ठाणं कुमारकोडीणं, संबपामोकखाणं सट्ठीए दुदंतसाहस्सीणं, महासेणपामोकखाणं छप्पण्णाए बलवग्गसाहस्सीणं वीरसेणपामोकखाणं एगवीसाए वीरसाहस्सीणं । उग्गसेणपामोकखाणं सोलसण्हं रायसाहस्सीणं, रुपिणी पामोकखाणं सोलसण्हं देविसाहस्सीणं अणंगसेणा- पामोकखाणं अणेगाणं गणिया साहस्सीणं, अण्णेसिं च बहूणं, ईसर तलवर माडंबिय- कोडुंबिय इब्भ-सेट्ठिसेणावइ सत्थवाहाणं बारवईए णयरीए अद्धभरहस्स य समंतस्स आहेवच्चं पोरेवच्चं भट्ठित्तं सामित्तं महत्तरगत्तं आणाईसरसेणावच्चं कारेमाणे पालेमाणे महयाऽऽहय-णट्ठ-गीय-वाइयतंती-तल-तालतुडिय-घण-मुयंग- पडुप्पवाइयरवेणं विउलाइं भोगभोगाइं भुंजमाणे विहरइ ।

७

तत्थ णं बारवईए णयरीए अंधगवण्ही णामं राया परिवसइ, वण्णओ । तस्स णं अंधगवण्हिस्स रण्णो धारिणी णामं देवी होत्था, वण्णओ । तए णं सा धारिणी देवी अण्णया कयाइं तंसि तारिसगंसि सयणिज्जंसि एवं जहा महब्बले-

सुमिणदंसण-कहणा, जम्मं बालत्तणं कलाओ य ।

जोव्वण-पाणिग्गहणं, कण्णा वासा य भोगा य ॥

णवरं गोयमो णामेणं । अट्ठण्हं रायवरकण्णाणं एगदिवसेणं पाणिं गेण्हावेति । अट्ठओ दाओ ।

८

तेणं कालेणं तेणं समएणं अरहा अरिद्वणेमी आइगरे जाव संजमेण तवसा अप्पाणं भावेमाणे विहरइ, चउव्विहा देवा आगया । कण्हे वि णिग्गए । तएणं तस्स गोयम कुमारस्स जाव जहा मेहे तहा णिग्गए । धम्मं सोच्चा णिसम्म हट्ठुट्ठे जाव जं णवरं देवाणुप्पिया! अम्मापियरो आपुच्छामि तओ पच्छा देवाणुप्पियाणं अंतिए मुंडे भवित्ता आगाराओ अणगारियं पव्वयामि । एवं जहा मेहे जाव तहा गोयमे वि सयमेव पंचमुट्ठियं लोयं करेइ । करित्ता जेणामेव समणे भगवं अरिद्वणेमी तेणामेव उवागच्छइ । उवागच्छित्ता समणं भगवं अरिद्वणेमिं तिक्खुत्तो आयाहिणं पयाहिणं करेइ करित्ता वंदइ, णमंसइ, वंदित्ता णमंसित्ता एवं वयासी-

आलित्ते णं भंते! लोए, पलित्ते णं भंते! लोए, आलित्तपलित्ते णं भंते! लोए जराए मरणेण य । से जहा णामए केई गाहावई आगारंसि झियायमाणंसि जे तत्थ भंडे भवइ अप्पभारे मोल्लगुरुए तं

गहाय आयाए एगंतं अवक्कमइ, एस मे णित्थारिए समाणे पच्छा पुरा हियाए सुहाए खमाए णिस्सेसाए आणुगामियत्ताए भविस्सइ । एवामेव मम वि एगे आया भंडे इट्ठे कंते पिए मणुण्णे मणामे, एस मे णित्थारिए समाणे संसारवोच्छेयकरे भविस्सइ । तं इच्छामि णं देवाणुप्पियाहिं सयमेव पव्वावियं, सयमेव मुंडावियं, सेहावियं, सिक्खावियं, सयमेव आयार- गोयर-विणय-वेणइय-चरण-करण-जाया- मायावत्तियं धम्ममाइक्खियं ।

९ तए णं समणे भगवं अरिद्वणेमी सयमेव पव्वावेइ जाव धम्ममाइक्खइ एवं देवाणुप्पिया! गंतव्वं चिद्वियव्वं णिसीयव्वं तुयद्वियव्वं भुंजियव्वं भासियव्वं, एवं उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमियव्वं, अस्सिं च णं अट्ठे णो पमाएयव्वं ।

तए णं से गोयमेकुमारे समणस्स भगवओ अरिद्वणेमिस्स अंतिए इमं एयारूवं धम्मियं उवएसं सोच्या णिसम्म सम्मं पडिवज्जइ । तमाणाए तह गच्छइ, तह चिट्ठइ, तह णिसीयइ, तह तुयइ, तह भुंजइ, तह भासइ, तह उट्ठाए उट्ठाय पाणेहिं भूएहिं जीवेहिं सत्तेहिं संजमइ तए णं से गोयमे अणगारे जाए- इरियासमिए जाव इणमेव णिग्गंथं पावयणं पुरओ काउं विहरइ ।

१० तए णं से गोयमे अण्णया कयाइं अरहओ अरिद्वणेमिस्स तहारूवाणं थेराणं अंतिए सामाइयमाइयाइं एक्कारस अंगाइ अहिज्जइ अहिज्जित्ता बहूहिं चउत्थ छट्ठम-दसम-दुवालसेहिं मासद्धमासखमणेहिं विविहेहिं तवोकम्महेहिं अप्पाणं भावेमाणे विहरइ । तए णं अरहा अरिद्वणेमी अण्णया कयाइं बारवईओ णयरीओ णंदणवणाओ पडिणिक्खमइ, बहिया जणवयविहारं विहरइ ।

११ तए णं से गोयमे अणगारे अण्णया कयाइ जेणेव अरहा अरिद्वणेमी तेणेव उवागच्छइ, उवागच्छित्ता अरहं अरिद्वणेमिं तिक्खुत्तो आयाहिणं पयाहिणं करेइ, करेत्ता वंदइ णमंसइ, वंदित्ता णमंसित्ता एवं वयासी-

इच्छामि णं भंते ! तुब्भेहिं अब्भणुण्णाए समाणे मासियं भिक्खुपडिमं उवसंपज्जित्ताणं विहरित्तए । एवं जहा खंदओ तहा बारस भिक्खुपडिमाओ फासेइ । गुणरयणं पि तवोकम्मं तहेव फासेइ णिरवसेसं । जहा खंदओ तहा चित्तेइ, तहा आपुच्छइ, तहा थेरेहिं सद्धिं सेत्तुंजं दुरुहइ, बारस वरिसाइं परियाए मासियाए संलेहणाए अप्पाणं झोसेइ, झोसित्ता सद्धिं भत्ताइं अणसणाए छेदेइ, छेदित्ता जस्सट्ठाए कीरइ णग्गभावे मुंडभावे, केसलोए, बंभचेरवासे, अण्हाणगं, अदंतवणयं अच्छत्तयं, अणुवाहणयं, भूमिसेज्जाओ, फलगसेज्जाओ, कट्ठ सेज्जाओ परघरप्पवेसे, लद्धावलद्धाइं माणावमाणाइं, परेसिं हीलणाओ, णिंदणाओ, खिंसणाओ, तालणाओ, गरहणाओ, उच्चावया विरूवरूवा गामकंटगा बावीसं परीसहोवसग्गा अहियासिज्जंति, तमट्ठं आराहेइ, चरिमेहिं उस्सास णिस्सासेहिं सिद्धे बुद्धे मुत्ते परिणिव्वुडे सव्वदुक्खपहीणे ।

१२ एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स पढमस्स अज्झयणस्स अयमट्ठे पण्णत्ते ।

॥ पढमं अज्झयणं समत्तं ॥

पढमो वग्गो

२-१० अज्झयणाणि

- १ एवं जहा गोयमे तहा सेसा । अंधग वण्ही पिया, धारिणी माया, समुद्धे, सागरे, गंभीरे, थिमिए, अयले, कंपिल्ले, अक्खोभे, पसेणई, विण्हुए, एए एगगमा ।
॥ पढमो वग्गो समत्तो ॥

बीओ वग्गो

१-८ अज्झयणाणि

- १ जइ णं भंते ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स अयमट्ठे पण्णत्ते, दोच्चस्स णं भंते ! वग्गस्स अंतगडदसाणं समणेणं भगवया महावीरेणं जाव संपत्तेणं कइ अज्झयणा पण्णत्ता ?
एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं दोच्चस्स वग्गस्स अट्ठ अज्झयणा पण्णत्ता ।
अक्खोभ सागर खलु, समुद्ध हिमवंत अचल णामे य ।
धरणे य पूरणे वि य, अभिचंदे चेव अट्ठमए ॥
तेणं कालेणं तेणं समएणं बारवई णामं णयरी होत्था । वण्ही पिया । धारिणी माया । जहा पढमो वग्गो तहा सव्वे अट्ठ अज्झयणा । गुणरयणं तवोकम्मं । सोलसवासाइं परिआओ ।
सेत्तुंजे मासियाए संलेहणाए सिद्धा ।
॥ बीओ वग्गो समत्तो ॥

तइओ वग्गो

१-६ अज्झयणाणि

अणीयसकुमाराइ

- १ तच्चस्स उक्खेवओ ।
एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स तेरस अज्झयणा पण्णत्ता, तं जहा- अणीयसे, अणंतसेणे, अणिहय, विऊ, देवजसे, सत्तुसेणे, सारणे, गए , सुमुहे, दुम्महे, कूवए, दारुए, अणादिट्ठी ।

जइ णं भंते ! समणेणं भगवया महावीरेणं जाव संपत्तेणं अट्टमस्स अंगस्स अंतगडदसाणं पढमस्स वग्गस्स तेरस अज्झयणा पण्णत्ता, पढमस्स णं भंते ! अज्झयणस्स के अट्ठे पण्णत्ते ?

२ एवं खलु जंबू ! तेणं कालेणं तेणं समएणं भद्विलपुरे णामं णयरे होत्था । वण्णओ । तस्स णं भद्विलपुरस्स णयरस्स उत्तरपुरत्थिमे दिसिभाए सिरिवणे णामं उज्जाणे होत्था । वण्णओ । जियसत्तू राया । तत्थ णं भद्विलपुरे णयरे णागे णामं गाहावई होत्था । अइडे दित्ते, वित्थिण्ण-विउल-भवण-सयणासण-जाण-वाहणाइण्णे, बहुधण- बहुजायरूव-रयए, आओगप्प- ओगसंपउत्ते विच्छिइडिय-विउल-भत्तपाणे, बहुदासी-दास-गो-महिस- गवेलगप्पभूए बहुजणस्स अपरिभूए । तस्स णं णागस्स गाहावइस्स सुलसा णामं भारिया होत्था । सुकुमाल-पाणि-पाया, अहीण-पडिपुण्ण-पंचिंदिय- सरीरा लक्खणवंजण-गुणोववेआ माणुम्माणप्पमाण-पडिपुण्णसुजाय- सव्वंगसुंदरंगी ससि-सोमाकार- कंत- पिय-दंसणा सुरूवा ।

३ तस्स णं णागस्स गाहावइस्स पुत्ते सुलसाए भारियाए अत्तए अणीयसे णामं कुमारे होत्था । सुकुमाले जाव सुरूवे पंचधाईपरिक्खित्ते तंजहा- खीरधाईए, मंडणधाईए, मज्जणधाईए, अंकधाईए, कीलावणधाईए एवं जहा दढपइण्णे जाव गिरिकंदरमल्लीणे व चंपगपायवे सुहंसुहेणं परिवड्ढइ ।

४ तए णं तं अणीयसं कुमारं सातिरेगअट्ठवासजायं [जाणित्ता]अम्मापियरो कलायरियस्स उवणेंति । तएणं से कलायरिए अणीयसं कुमारं लेहाइयाओ गणितप्पहाणाओ सउणिरुतपज्जवसाणाओ बावत्तरिं कलाओ सुत्तओ अ अत्थओ अ करणओ य सेहावेइ, सिक्खावेइ । तंजहा-

(१) लेहं (२) गणियं (३) रूवं (४) णट्ठं (५) गीयं (६) वाइयं (७) सरगयं (८) पुक्खरगयं (९) समतालं (१०) जूयं (११) जणवायं (१२) पोरेकच्चं (१३) अट्ठावयं (१४) दगमट्ठियं (१५) अण्णविही (१६) पाणविही (१७) वत्थविही (१८) सयणविही (१९) अज्जं (२०) पहेलीयं (२१) मागहियं (२२) गाहं (२३) सिलोगं (२४) गंधजुत्तिं (२५) मधुसित्थं (२६) आभरणविही (२७) तरुणीपडिकम्मं (२८) इत्थीलक्खणं (२९) पुरिसलक्खणं (३०) हयलक्खणं (३१) गयलक्खणं (३२) गोणलक्खणं (३३) कुक्कुडलक्खणं (३४) मिंढलक्खणं (३५) चक्कलक्खणं (३६) छत्तलक्खणं (३७) दंडलक्खणं (३८) असिलक्खणं (३९) मणिलक्खणं (४०) कागणिलक्खणं (४१) चम्मलक्खणं (४२) चंदचरियं (४३) सूरचरियं (४४) राहुचरियं (४५) गहचरियं (४६) सोभागकरं (४७) दोभागकरं (४८) विज्जागयं (४९) मंतगयं (५०) रहस्सगयं (५१) सभासं (५२) चारं (५३) पडिचारं (५४) बूहं (५५) पडिबूहं (५६) खंधावारमाणं (५७) णगरमाणं (५८) वत्थुमाणं (५९) खंधावारणिवेसं (६०) वत्थुणिवेसं (६१) णगरणिवेसं (६२) ईसत्थं (६३) छरुप्पवायं (६४) आससिक्खं (६५) हत्थिसिक्खं (६६) धणुव्वेयं (६७) हिरण्णपागं सुवण्णपागं मणिपागं धाउपागं (६८) बाहुजुद्धं मुट्ठिजुद्धं अट्ठिजुद्धं जुद्धं णिजुद्धं जुद्धाइजुद्धं (६९) सुत्तखेडं णालियाखेडं वट्ठखेडं धम्मखेडं चम्मखेडं (७०) पत्तछेज्जं कडगच्छेज्जं (७१) सजीवं णिज्जीवं (७२) सउणिरुयं ।

तए णं से कलायरिए अणीयसं कुमारं लेहाइयाओ गणियप्पहाणाओ सउणिरुय पज्जवसाणाओ बावत्तरिं कलाओ सुत्तओ य अत्थओ य गंथओ य करणओ य, सेहावेत्ता सिक्खावेत्ता अम्मापिऊणं उवणेइ ।

तए णं अणीयसकुमारस्स अम्मापियरो तं कलायरियं मधुरेहिं वयणेहिं विपुलेणं असण-पाण-
खाइम-साइमेणं वत्थ-गंध- मल्लालंकारेणं सक्कारेंति, सम्माणेंति, सक्कारित्ता सम्माणित्ता
विपुलं जीवियारिहं पीइदाणं दलयंति, दलइत्ता पडिविसज्जेति ।

तए णं से अणीयसकुमारे उम्मुक्कबालभावे विण्णायपरिणयमेत्ते जोवण- गमणुपत्ते
बावत्तरिकलापंडिए णवंगसुत्तपडिबोहिए अट्टारस- विहिप्पगारदेसी- भासाविसारए गीयरई
गंधव्वणट्टकुसले जाव अलं भोगसमत्थे जाए यावि होत्था।

५

तए णं तं अणीयसं कुमारं उम्मुक्कबालभावं जाणित्ता अम्मापियरो सरिसियाणं सरिव्वयाणं
सरित्तयाणं सरिसलावण्ण-रूव-जोव्वण- गुणोववेयाणं सरिसएहिंतो इब्भकुलेहिंतो आणिल्लियाणं
बत्तीसाए इब्भवरकण्णगाणं एगदिवसेणं पाणिं गेण्हावेंति ।

तए णं से णागे गाहावई अणीयस्स कुमारस्स इमं एयारूवं पीइदाणं दलयइ, तंजहा- बत्तीसं
हिरण्णकोडीओ, एवं जहा महाबलस्स जाव अण्णं वा सुबहुं हिरण्णं वा सुवण्णं वा कंसं वा दूसं
वा विउलधण-कणग जाव संतसारसावएज्जं, अलाहि जाव आसत्तमाओ कुलवंसाओ पकामं दाउं,
पकामं भोत्तुं, पकामं परिभाएउं ।

तए णं से अणीयसे कुमारे एगमेगाए भज्जाए एगमेगं हिरण्णकोडिं दलयइ, एगमेगं सुवण्णकोडिं
दलयइ, एगमेगं मउडं मउडप्पवरं दलयइ, एवं तं चेव सव्वं जाव एगमेगं पेसणकारिं दलयइ, अण्णं
वा सुबहुं हिरण्णं वा जाव परिभाएउं । तए णं से अणीयसकुमारे उप्पिं पासायवरगए फुट्टमाणेहिं
मुइंगमत्थएहिं जाव पंचविहे माणुस्सए कामभोगे पच्चणुभवमाणे विहरइ ।

६

तेणं कालेणं तेणं समएणं अरहा अरिद्वणेमी जेणेव भद्विलपुर णयरे जेणेव सिरिवणे उज्जाणे
तेणेव उवागच्छइ उवागच्छित्ता अहा पडिरूवं उग्गहं उग्गिण्हित्ता संजमेण तवसा अप्पाणं
भावेमाणे विहरइ । परिसा णिग्गया ।

तए णं तस्स अणीयसस्स कुमारस्स तं महाजणसद्वं च जणकलकलं च सुणेत्ता जाव जहा
गोयमे तहा अणगारे जाए । णवरं सामाइयमाइयाइं चउद्धस पुव्वाइं अहिज्जइ । बीसं वासाइं
परियाओ । सेसं तहेव जाव सेत्तुंजे पव्वए मासियाए संलेहणाए जाव सिद्धे ।

एवं खलु जंबू ! समणेणं भगवया महावीरेणं जाव संपत्तेणं अट्टमस्स अंगस्स अंतगडदसाणं
तच्चस्स वग्गस्स पढमस्स अज्झयणस्स अयमट्ठे पण्णत्ते ।

७

एवं जहा अणीयसे, एवं सेसा वि अणंतसेणे जाव सत्तुसेणे छ अज्झयणा एक्कगमा ।
बत्तीसओ दाओ । वीसं बासाइं परियाओ, चउद्धस पुव्वाइं अहिज्जइ । सेत्तुंजे सिद्धा ।

॥ तइओ वग्गो समत्तो ॥

तइओ वग्गो

सत्तमं अज्झयणं

१

तेणं कालेणं तेणं समएणं बारवईए णयरीए, जहा पढमे, णवरं-वसुदेवे राया । धारिणी देवी।
सीहो सुमिणे । सारणे कुमारे । पण्णासओ दाओ । चउद्धस पुव्वा । वीसं वासा परियाओ । सेसं
जहा गोयमस्स जाव सेत्तुंजे सिद्धे।

॥ तइओ वग्गो समत्तो ॥

तइओ वग्गो

अट्ठमं अज्झयणं

गयसकुमाले

- १ जइ णं भंते ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स सत्तमस्स अज्झयणस्स अयमट्ठे पण्णत्ते, अट्ठमस्स णं भंते ! अज्झयणस्स के अट्ठे पण्णत्ते ?
एवं खलु जंबू ! तेणं कालेणं तेणं समएणं बारवईए णयरीए, जहा पढमे जाव अरहा अरिद्वणेमी समोसडे ।
- २ णं कालेणं तेणं समएणं अरहओ अरिद्वणेमिस्स अंतेवासी छ अणगारा भायरो सहोदरा होत्था । सरिसया सरित्तया सरिव्वया णीलुप्पल-गवल-गुलिय-अयसिकुसुमप्पगासा सिरिवच्छंक्रियवच्छा कुसुमकुंडलभद्दलया णलकुबर समाणा ।
तए णं ते छ अणगारा जं चेव दिवसं मुंडा भवित्ता अगाराओ अणगारियं पव्वइया, तं चेव दिवसं अरहं अरिद्वणेमिं वंदंति णमंसंति, वंदित्ता णमंसित्ता एवं वयासी-
इच्छामो णं भंते ! तुब्भेहिं अब्भणुण्णाया समाणा जावज्जीवाए छट्ठंछट्ठेणं अणिक्खित्तेणं तवोक्कमेणं संजमेणं तवसा अप्पाणं भावेमाणा विहरित्तए । अहासुहं देवाणुप्पिया ! मा पडिबंधं करेह । तए णं ते छ अणगारा अरहया अरिद्वणेमिणा अब्भणुण्णाया समाणा जावज्जीवाए छट्ठंछट्ठेणं जाव विहरंति ।
- ३ तए णं ते छ अणगारा अण्णया कयाई छट्ठक्खमणपारणयंसि पढमाए पोरिसीए सज्झायं करेंति, बीयाए पोरिसीए झाणं झियायंति, तइयाए पोरिसीए अतुरियमचवलमसंभंता मुहपोत्तियं पडिलेहंति, पडिलेहित्ता भायण-वत्थाइं पडिलेहंति, पडिलेहित्ता भायणाइं पमज्जंति, पमज्जित्ता भायणाइं उग्गाहेंति, उग्गाहित्ता जेणेव अरहा अरिद्वणेमि तेणेव उवागच्छंति उवागच्छित्ता अरहं अरिद्वणेमिं वंदंति णमंसंति, वंदित्ता णमंसित्ता एवं वयासी-
इच्छामो णं भंते ! छट्ठक्खमणस्स पारणए तुब्भेहिं अब्भणुण्णाया समाणा तिहिं संघाडएहिं बारवईए णयरीए जाव अडित्तए । अहासुहं देवाणुप्पिया ! मा पडिबंधं करेह ।
तए णं ते छ अणगारा अरहया अरिद्वणेमिणा अब्भणुण्णाया समाणा अरहं अरिद्वणेमिं वंदंति णमंसंति, वंदित्ता, णमंसित्ता अरहओ अरिद्वणेमिस्स अंतियाओ सहसंबवणाओ पडिणिक्खमंति, पडिणिक्खमित्ता तिहिं संघाडएहिं अतुरियं जाव अडंति ।
- ४ तत्थ णं एगे संघाडए बारवईए णयरीए उच्च-णीय-मज्झिमाइं कुलाइं घरसमुदाणस्स भिक्खायरियाए अडमाणे अडमाणे वसुदेवस्स रण्णो देवईए देवीए गेहे अणुप्पविट्ठे ।

तए णं सा देवई देवी ते अणगारे एज्जमाणे पासइ, पासित्ता हट्ठ जाव हियया आसणाओ अब्भुट्ठेइ, अब्भुट्ठित्ता सत्तट्ठ पयाइं अणुगच्छइ अणुगच्छित्ता, तिक्खुत्तो आयाहिणं पयाहिणं करेइ, करेत्ता वंदइ णमंसइ, वंदित्ता णमंसित्ता जेणेव भत्तघरणे तेणेव उवागया सीहकेसराणं मोयगाणं थालं भरेइ, ते अणगारे पडिलाभेइ, वंदइ णमंसइ, वंदित्ता णमंसित्ता पडिविसज्जेइ। तयाणंतरं दोच्चे संघाडए जाव देवईए देवीए गेहे अणुप्पविट्ठे । तए णं सा देवई देवी ते अणगारे एज्जमाणे पासइ, पासित्ता हट्ठ जाव ते अणगारे पडिलाभेइ, वंदइ, णमंसइ, वंदित्ता, णमंसित्ता पडिविसज्जेइ ।

५ तयाणंतरं च णं तच्चे संघाडए जाव देवईए देवीए गेहे अणुप्पविट्ठे । तए णं सा देवई देवी ते अणगारे एज्जमाणे पासइ, पासित्ता हट्ठ जाव ते अणगारे पडिलाभेइ, पडिलाभेत्ता एवं वयासी-किण्णं देवाणुप्पिया ! कण्हस्स वासुदेवस्स इमीसे बारवईए णयरीए दुवालस जोयणायामाए णवजोयण वित्थिण्णाए जाव पच्चक्खं देवलोगभूयाए समणा णिग्गंथा जाव अडमाणा भत्तपाणं णो लभंति, जण्णं ताइं चेव कुलाइं भत्तपाणाए भुज्जो-भुज्जो अणुप्पविसंति ?

६ तए णं ते अणगारा देवइं देविं एवं वयासी- णो खलु देवाणुप्पिए ! कण्हस्स वासुदेवस्स इमीसे बारवईए णयरीए जाव देवलोगभूयाए समणा णिग्गंथा जाव अडमाणा भत्तपाणं णो लभंति णो चेव णं ताइं ताइं कुलाइं दोच्चंपि तच्चंपि भत्तपाणाए अणुप्पविसंति ।

एवं खलु देवाणुप्पिए ! अम्हे भद्विलपुरे णयरे णागस्स गाहावइस्स पुत्ता सुलसाए भारियाए अत्तया छ भायरो सहोदरा सरिसया जाव णल-कुबरसमाणा अरहओ अरिद्वणेमिस्स अंतिए धम्मं सोच्या संसारभउव्विग्गा भीया जम्ममरणाणं मुंडा जाव पव्वइया । तए णं अम्हे जं चेव दिवसं पव्वइआ तं चेव दिवसं अरहं अरिद्वणेमिं वंदामो णमंसामो, इमं एयारूवं अभिग्गहं ओगिण्हामो-इच्छामो णं भंते ! तुब्भेहिं अब्भणुण्णाया समाणा जावज्जीवाए छट्ठंछट्ठेणं अणिक्खित्तेणं तवोकम्मणं संजमेणं तवसा अप्पाणं भावेमाणा विहरित्तए ।

अहासुहं देवाणुप्पिया ! मा पडिबंधं करेह ।

तए णं अम्हे अरहया अरिद्वणेमिणा अब्भणुण्णाया समाणा जावज्जीवाए छट्ठंछट्ठेणं जाव विहरामो । तं अम्हे अज्ज छट्ठक्खमणपारणयंसि पढमाए पोरिसीए सज्झायं करेत्ता बीयाए पोरिसीए झाणं झियाइत्ता जाव तिहिं संघाडएहिं बारवईए णयरीए जाव अडमाणा तव गेहं अणुप्पविट्ठा । तं णो खलु देवाणुप्पिए ! ते चेव णं अम्हे, अम्हे णं अण्णे । देवइं देविं एवं वदंति, वदित्ता जामेव दिसं पाउब्भूया तामेव दिसं पडिगया ।

७ तए णं तीसे देवईए देवीए अयमेवारूवे अज्झत्थिए चिंतिए पत्थिए मणोगए संकप्पे समुप्पण्णे- एवं खलु अहं पोलासपुरे णयरे अइमुत्तेणं कुमारसमणेणं बालत्तणे वागरिआ- तुमण्णं देवाणुप्पिए ! अट्ठ पुत्ते पयाइस्ससि सरिसए जाव णलकुबरसमाणे, णो चेव णं भरहे वासे अण्णाओ अम्मयाओ तारिसए पुत्ते पयाइस्संति । तं णं मिच्छा । इमं णं पच्चक्खमेव दिस्सइ-भरहे वासे अण्णाओ वि अम्मयाओ खलु एरिसए जाव पुत्ते पयायाओ । तं गच्छामि णं अरहं अरिद्वणेमिं वंदामि णमंसामि, वंदित्ता णमंसित्ता इमं च णं एयारूवं वागरणं पुच्छिस्सामित्ति कट्ठु एवं संपेहेइ, संपेहेत्ता कोडुंबियपुरिसे सद्दावेइ, सद्दावित्ता एवं वयासी-खिप्पामेव भो देवाणुप्पिया! लहुकरण जुत्तजोइय समखुरवालिहाण-समालिहियसिंगेहिं,

जंबूणयामय-कलावजुत्त परिविसिद्धेहिं रययामयघंटा-सुत्तरज्जुयपवर कंचणत्थ
 पग्गहोग्गहियएहिं, णीलुप्पल-कयामेलएहिं, पवरगोणजुवाणएहिं
 णाणामणिरयणघंटियाजालपरिगयं, सुजायजुगजोत्त- रज्जुयजुग पसत्थ सुविरचियणिम्मियं,
 पवरलक्खणोववेयं धम्मियं जाणप्पवरं जुत्तामेव उवड्डवेह, उवड्डवेत्ता मम एयमाणत्तियं
 पच्चप्पिणह । तए णं ते कोडुंबियपुरिसा एवं वुत्ता समाणा हड्ड जाव हियया, करयल परिगहियं
 दसणहं सिरसावत्तं मत्थए अंजलिं कट्ठु एवं तहत्तिआणाए विणएणं वयणे पडिसुणैति
 पडिसुणेत्ता खिप्पामेव लहुकरणजुत्त जाव धम्मियं जाणप्पवरं जुत्तामेव उवड्डवेत्ता तमाणत्तियं
 पच्चपिणैति । जहा देवाणंदा जाव पज्जुवासइ ।

तए णं अरहा अरिद्वणेमि देवइं देविं एवं वयासी- से णूणं तव देवई ! इमे छ अणगारे पासित्ता
 अयमेयारूवे अज्झत्थिए चिंतिए पत्थिए मणोगए संकप्पे समुप्पण्णे एवं खलु अहं पोलासपुरे
 णयरे अइमुत्तेणं कुमार समणेणं बालत्तणे वागरिया तं चेव जाव तं णिग्गच्छसि,
 णिग्गच्छित्ता जेणेव मम अंतियं तेणेव हव्वमागया, से णूणं देवई ! अट्ठे समट्ठे ? हंता अत्थि ।

८

एवं खलु देवाणुप्पिए ! तेणं कालेणं तेणं समएणं भद्विलपुरे णयरे णागे णामं गाहावई परिवसइ
 । अट्ठे जाव अपरिभूए । तस्स णं णागस्स गाहावइस्स सुलसा णामं भारिया होत्था । तए णं
 सा सुलसा बालत्तणे चेव णेमिस्सिएण वागरिया-एस्स णं दारिया णिंदू भविस्सइ । तए णं सा
 सुलसा बालप्पभिइं चेव हरिणेगमेसीदेवभत्तया यावि होत्था । हरिणेगमेसिस्स पडिमं करेइ,
 करेत्ता कल्लाकलिं णहाया जाव उल्लपडसाडया महरिहं पुप्फच्चणं करेइ, करेत्ता जाणुपायपडिया
 पणामं करेइ, करेत्ता तओ पच्छा आहारेइ वा णीहारेइ वा चरइ वा ।

तए णं तीसे सुलसाए गाहावइणीए भत्तिबहुमाणसुस्सूसाए हरिणेगमेसी देवे आराहिए यावि
 होत्था । तए णं से हरिणेगमेसी देवे सुलसाए गाहावइणीए अणुकंपणद्वयाए सुलसं गाहावइणिं
 तुमं च दो वि समउउयाओ करेइ । तए णं तुब्भे दो वि सममेव गब्भे गिण्हइ, सममेव गब्भे
 परिवहइ, सममेव दारए पयायइ । तए णं सा सुलसा गाहावइणी विणिहायमावण्णे दारए पयायइ
 । तए णं से हरिणेगमेसी देवे सुलसाए अणुकंपणद्वयाए विणिहायमावण्णे दारए करयल-संपुडेणं
 गेण्हइ, गेण्हित्ता तव अंतियं साहरइ । तं समयं च णं तुमं पि णवण्हं मासाणं सुकुमालदारए
 पसवसि । जे वि य णं देवाणुप्पिए ! तव पुत्ता ते वि य तव अंतिआओ करयलसंपुडेणं गेण्हइ,
 गेण्हित्ता सुलसाए गाहावइणीए अंतिए साहरइ । तं तव चेव णं देवई ! एए पुत्ता । णो सुलसाए
 गाहावइणीए ।

९

तए णं सा देवई देवी अरहओ अरिद्वणेमिस्स अंतिए एयमट्ठं सोच्चा णिसम्म हड्डतुड्ड जाव
 हियया अरहं अरिद्वणेमिं वंदइ णमंसइ, वंदित्ता णमंसित्ता जेणेव ते छ अणगारा तेणेव
 उवागच्छइ, उवागच्छित्ता ते छप्पि अणगारे वंदइ णमंसइ, वंदित्ता णमंसित्ता आगयपण्हया,
 पप्फुयलोयणा, कंचुयपरिक्खित्तया, दरियवल्लय-बाहा, धाराहय-कलंब-पुप्फगं विव समूससिय-
 रोमकूवा ते छप्पि अणगारे अणिमिसाए दिट्ठीए पेहमाणी-पेहमाणी सुचिरं णिरिक्खइ,
 णिरिक्खित्ता वंदइ णमंसइ, वंदित्ता णमंसित्ता जेणेव अरहा अरिद्वणेमी तेणेव उवागच्छइ,
 उवागच्छित्ता अरहं अरिद्वणेमिं तिक्खुत्तो आयाहिणं पयाहिणं करेइ, करेत्ता वंदइ णमंसइ,
 वंदित्ता णमंसित्ता तमेव धम्मियं जाणप्पवरं दुरुहइ दुरुहित्ता जेणेव बारवई णयरी तेणेव
 उवागच्छइ उवागच्छित्ता बारवइं णयरिं अणुप्पविसइ, अणुप्पविसित्ता जेणेव सए गिहे जेणेव

बाहिरिया उवढाणसाला तेणेव उवागया, धम्मियाओ जाणप्पवराओ पच्चोरुहइ, पच्चोरुहित्ता जेणेव सए वासघरे जेणेव सए सयणिज्जे तेणेव उवागया सयंसि सयणिज्जंसि णिसीयइ ।

१० तए णं तीसे देवईए देवीए अयं अज्झत्थिए चिंतिए पत्थिए मणोगए संकप्पे समुप्पण्णे- एवं खलु अहं सरिसए जाव णलकुबरसमाणे सत्त पुत्ते पयाया, णो चेव णं मए एगस्स वि बालत्तणए समणुभूए । एस वि य णं कणहे वासुदेवे छण्हं छण्हं मासाणं ममं अंतियं पायवंदए हव्वमागच्छइ । तं धण्णाओ णं ताओ अम्मयाओ, पुण्णाओ णं ताओ अम्मयाओ, कयपुण्णाओ णं ताओ अम्मयाओ, कयलक्खणाओ णं ताओ अम्मयाओ, जासिं मण्णे णियग- कुच्छि-संभूयाइं थणदुद्ध-लुद्धयाइं महर समुल्लावायाइं मम्मण-पजंपियाइं थण- मूलकक्खदेसभागं अभिसरमाणाइं मुद्धयाइं पुणो य कोमल-कमलोवमेहिं गिण्हिऊण उच्छंगे णिवेसियाइं देंति समुल्लावए सुमहुरे पुणो-पुणो मंजुलप्प- भणिए । अहं णं अधण्णा अपुण्णा अकयपुण्णा अकयलक्खणा एत्तो एकतरमवि ण पत्ता, ओहय मणसंकप्पा करयलपल्हत्थमुही अट्ठज्झाणोवगया झियायइ ।

११ इमं च णं कणहे वासुदेवे ण्हाए जाव विभूसिए देवईए देवीए पायवंदए हव्वमागच्छइ । तए णं से कणहे वासुदेवे देवइं देविं पासइ, पासित्ता देवईए देवीए पायग्गहणं करेइ, करित्ता देवइं देविं एवं वयासी-

अण्णया णं अम्मो ! तुब्भे ममं पासित्ता हट्ठतुट्ठा जाव हियया भवह, किण्णं अम्मो ! अज्ज तुब्भे ओहयमणसंकप्पा जाव झियायह ?

तए णं सा देवई देवी कण्हं वासुदेवं एवं वयासी- एवं खलु अहं पुत्ता ! सरिसए जाव णलकुबरसमाणे सत्त पुत्ते पयाया, णो चेव णं मए एगस्स वि बालत्तणे अणुभूए । तुमं पि य णं पुत्ता ! छण्हं-छण्हं मासाणं ममं अंतियं पायवंदए हव्वमागच्छसि । तं धण्णाओ णं ताओ अम्मयाओ जाव झियामि ।

१२ तए णं से कणहे वासुदेवे देवइं देविं एवं वयासी- मा णं तुब्भे अम्मो ! ओहयमणसंकप्पा जाव झियायह । अहण्णं तहा जइस्सामि जहा णं ममं सहोदरे कणीयसे भाउए भविस्सइ त्ति कट्ठु देवइं देविं ताहिं इट्ठाहिं कंताहिं पियाहिं मणुण्णाहिं मणामाहिं वग्गूहिं समासासेइ समासासित्ता तओ पडिणिक्खमइ, पडिणिक्खमित्ता जेणेव पोसहसाला तेणेव उवागच्छइ, उवागच्छित्ता पोसहसालं पमज्जइ पमज्जित्ता उच्चारपासवणभूमिं पडिलेहेइ पडिलेहित्ता दब्भसंथारगं पडिलेहेइ पडिलेहित्ता दब्भसंथारगं संथरइ संथरित्ता दब्भसंथारगं दुरुहइ दुरुहित्ता हरिणेगमेसिस्स अट्ठमभत्तं पगिण्हइ, अट्ठमभत्तं पगिण्हित्ता पोसहसालाए पोसहिए इव बंभचारी हरिणेगमेसिं देवं मणसि करेमाणे करेमाणे चिद्धइ ।

१३ तए णं तस्स कणहस्स वासुदेवस्स अट्ठमभत्ते परिणममाणे हरिणेगमेसिस्स देवस्स आसणं चलइ जाव अहं इहं हव्वमागए । संदिसाहि णं देवाणुप्पिया । किं करेमि ? किं दलामि ? किं पयच्छामि ? किं वा ते हियइच्छियं ।

तए णं से कणहे वासुदेवे तं हरिणेगमेसिं देवं अंतिलिक्खपडिवण्णं पासइ, पासित्ता हट्ठतुट्ठे पोसहं पारेइ, पारित्ता करयलपरिग्गहियं अंजलिं कट्ठु एवं वयासी- इच्छामि णं देवाणुप्पिया ! सहोयरं कणीयसं भाउयं विदिण्णं ।

१४ तए णं से हरिणेगमेसी कण्हं वासुदेवं एवं वयासी- होहिइ णं देवाणुप्पिया ! तव देवलोयचुए सहोयरे कणीयसे भाउए । से णं उम्मुक्क- बालभावे विण्णयपरिणयमेत्ते जोव्वणगमणुपत्ते अरहओ अरिद्वणेमिस्स अंतियं मुंडे भवित्ता अगाराओ अणगारियं पव्वइस्सइ । कण्हं वासुदेवं दोच्चं पि तच्चं पि एवं वयइ, वइत्ता जामेव दिसं पाउब्भूए तामेव दिसं पडिगए ।

तए णं से कण्हे वासुदेवे पोसहसालाओ पडिणिवत्तइ, पडिणिवत्तित्ता जेणेव देवई देवी तेणेव उवागच्छइ, उवागच्छित्ता देवईए देवीए पायग्गहणं करेइ, करेत्ता एवं वयासी- होहिइ णं अम्मो ! मम सहोयरे कणीयसे भाउए त्ति कट्ठु देवइं देविं ताहिं इट्ठाहिं जाव मणामाहिं वग्गूहिं आसासेइ, आसासित्ता जामेव दिसं पाउब्भूए तामेव दिसं पडिगए ।

१५ तए णं सा देवई देवी अण्णया कयाइं तंसि तारिसगंसि जाव सीहं सुमिणे पासित्ता णं पडिबुद्धा समाणी हट्ठुत्तु जाव हरिसवसविसप्पमाण हियया एवं जहा महब्बले जाव तं गब्भं सुहंसुहेणं परिवहइ ।

तए णं सा देवई देवी णवण्हं मासाणं बहुपडिपुण्णाणं जासुमण- रत्तबंधु- जीवय- लक्खारस सरसपारिजातक-तरुणदिवायर-समप्पभं सव्वणयणकंतं- सुकुमाल पाणिपायं जाव सुरूवं गयतालुसमाणं दारयं पयाया । जम्मणं जहा मेहकुमारे जाव जम्हा णं इमे दारगे गयतालुसमाणे तं होउ णं अम्ह एयस्स दारगस्स णामधेज्जे गयसुकुमाले । तए णं तस्स दारगस्स अम्मापियरे णामं करेइ गयसुकुमालोत्ति सेसं जहा मेहे जाव अलं भोगसमत्थे जाए यावि होत्था ।

१६ तत्थ णं बारवईए णयरीए सोमिले णाम माहणे परिवसइ । अड्ढे जाव अपरिभूए । रिउव्वेद यजुव्वेद-सामवेद-अहव्वणवेद-इतिहासपंचमाणं, णिघंटु- छट्ठाणं, चउण्हं वेदाणं संगोवंगाणं- सरहस्साणं सारए, वारए, धारए, पारए, सडंगवी, सट्ठितंतविसारए, संखाणे, सिक्खाकप्पे, वागरणे, छंदे, णिरुत्ते, जोइसामयणे, अण्णेसु य बहूसु बंभणएसु परिवायएसु णयेसु सुपरिणिट्ठिए यावि होत्था । तस्स सोमिल माहणस्स सोमसिरी णामं माहणी होत्था, वण्णओ । तस्स णं सोमिलस्स धूया सोमसिरीए माहणीए अत्तया सोमा णामं दारिया होत्था । सुकुमालपाणिपाया जाव सुरूवा । रूवेणं जोव्वणेणं लावण्णेणं उक्किट्ठा उक्किट्ठसरीरा यावि होत्था ।

तए णं सा सोमा दारिया अण्णया कयाइ प्हाया जाव विभूसिया, बहूहिं खुज्जाहिं जाव महत्तरविंदं परिक्खित्ता सयाओ गिहाओ पडिणिक्खमइ पडिणिक्ख- मित्ता जेणेव रायमग्गे तेणेव उवागच्छइ, उवागच्छित्ता रायमग्गंसि कणगतिंदूसएणं कीलमाणी चिट्ठइ ।

१७ तेणं कालेणं तेणं समएणं अरहा अरिद्वणेमि समोसढे । परिसा णिग्गया । तए णं से कण्हे वासुदेवे इमीसे कहाए लद्धे समणे प्हाए जाव विभूसिए गयसुकुमालेणं कुमारेणं सद्धिं हत्थिखंधवरगए सकोरंटमल्लदामेणं छत्तेणं धरिज्जमाणेणं सेयवरचामराहिं उद्धुव्वमाणीहिं उद्धुव्वमाणीहिं बारवईए णयरीए मज्झंमज्झेणं अरहओ अरिद्वणेमिस्स पायवंदए णिग्गच्छमाणे सोमं दारियं पासइ, पासित्ता सोमाए दारियाए रूवेण य जोव्वणेण य लावण्णेण य जायविम्हए कोडुंबियपुरिसे सद्दावेइ, सद्दावित्ता एवं वयासी- गच्छह णं तुब्भे देवाणुप्पिया ! सोमिलं माहणं जायित्ता सोमं दारियं गेण्हइ, गेण्हित्ता कण्णंतेउरंसि पक्खिवह । तए णं एसा गयसुकुमालस्स

कुमारस्स भारिया भविस्सइ । तए णं कोडुंबिय पुरिसा सोमं दारियं गेण्हित्ता कण्णंतेउरंसि पक्खिवंति जाव पच्चप्पिणंति ।

१८

तए णं से कण्हे वासुदेवे बारवईए णयरीए मज्झंमज्झेणं णिगच्छइ, णिगच्छित्ता जेणेव सहसंबवणे उज्जाणे जेणेव अरहा अरिद्वणेमि तेणेव उवागच्छइ उवागच्छित्ता अरहओ अरिद्वणेमिस्स छत्तातिछत्तं पडागातिपडागं विज्जाहरचारणे जंभए य देवे ओवयमाणे उप्पयमाणे पासइ, पासित्ता अरहं अरिद्वणेमिं पंचविहेणं अभिगमेणं अभिगच्छइ । तंजहा- सचित्ताणं दव्वाणं विउसरणयाए, अचित्ताणं दव्वाणं विउसरणयाए, एगसाडियं उत्तरासंगकरणेणं, चक्खुप्फासे अंजलिपग्गहेणं, मणसो एगत्तीकरणेणं । जेणामेव अरहा अरिद्वणेमि तेणामेव उवागच्छइ, विणएणं पज्जुवासइ । तए णं अरहा अरिद्वणेमि कण्हस्स वासुदेवस्स गयसुकुमालस्स कुमारस्स तीसे य महइ महालियाए परिसाए धम्मं कहेइ, कण्हे पडिगए ।

तए णं से गयसुकुमाले अरहओ अरिद्वणेमिस्स अंतियं धम्मं सोच्चा, णिसम्म हइतुइ अरहं अरिद्वणेमिं तिक्खुत्तो आयाहिणं पयाहिणं करेइ, करित्ता वंदइ णमंसइ, वंदित्ता णमंसित्ता एवं वयासी- सद्धहामि णं भंते! णिगंगंथं पावयणं, पतियामि णं भंते ! णिगंगंथं पावयणं, रोएमि णं भंते ! णिगंगंथं पावयणं, अब्भुट्टेमि णं भंते ! णिगंगंथं पावयणं । एवमेयं भंते ! तहमेयं भंते ! अवितहमेयं भंते! इच्छियमेयं भंते! पडिच्छियमेयं भंते! इच्छिय-पडिच्छियमेयं भंते ! से जहेयं तुब्भे वयह! णवरं देवाणुप्पिया! अम्मापियरो आपुच्छामि । तओ पच्छा मुंडे भवित्ता णं अगाराओ अणगारियं पव्वइस्सामि ।

अहासुहं देवाणुप्पिया ! मा पडिबंधं करेह ।

तए णं से गयसुकुमाले अरहं अरिद्वणेमिं वंदइ, णमंसइ, वंदित्ता णमंसित्ता जेणामेव हत्थिरयणे तेणामेव उवागच्छइ, उवागच्छित्ता हत्थिखंधवरगए, महयाभड- चडगर पहकरेणं बारवईए णयरीए मज्झंमज्झेणं जेणामेव सए भवणे तेणामेव उवागच्छइ, उवागच्छित्ता हत्थिखंधाओ पच्चोरुहइ, पच्चोरुहित्ता जेणामेव अम्मापियरो तेणामेव उवागच्छइ, उवागच्छित्ता अम्मापिऊणं पायवडणं करेइ, करित्ता एवं वयासी- एवं खलु अम्मयाओ ! मए अरहओ अरिद्वणेमिस्स अंतिए धम्मं णिसंते, से वि य मे धम्मं इच्छिए पडिच्छिए अभिरुइए ।

१९

तए णं तस्स गयसुकुमालस्स अम्मापियरो एवं वयासी धण्णोसि तुमं जाया ! संपुण्णोसि तुमं जाया ! कयत्थोसि तुमं जाया ! कयलक्खणोसि तुमं जाया ! जण्णं तुमे अरहओ अरिद्वणेमिस्स अंतिए धम्मं णिसंते से वि य ते धम्मं इच्छिए पडिच्छिए अभिरुइए ।

तए णं से गयसुकुमाले अम्मापियरो दोच्चं पि एवं वयासी जाव अभिरुइए । तं इच्छामि णं अम्मयाओ ! तुब्भेहिं अब्भणुण्णाए समाणे अरहओ अरिद्वणेमिस्स अंतिए मुंडे भवित्ता णं अगाराओ अणगारियं पव्वइत्तए ।

तए णं सा देवई देवी तं अणिद्वं अकंतं अप्पियं अमण्णुणं अमणामं अस्सुयपुव्वं फरुसं गिरं सोच्चा णिसम्म इमेणं एयारूवेणं मणोमाणसिएणं महया पुत्तदुक्खेणं अभिभूया समाणी सेयागय-रोमकूवपगलंत-चिलिणगाया सोयभर-पवेवियंगी णित्तेया दीण-विमण-वयणा-करयलमलियव्व कमलमाला तक्खणओलुग्ग दुब्बलसरीर-लावण्णसुण्ण-णिच्छाय-गयसिरीया पसिदिलभूसण-पडंतखुम्मिय संचुण्णियधवलवलय-पब्भइ-उत्तरिज्जा सूमालवि- किण्ण-केसहत्था

मुच्छावसणद्ध-चेय-गरुई परसुणियत्त व्व चंपगलया णिव्वत्त- महेव्व इंदलद्धी विमुक्क संधि-
बंधणा कोट्टिमत्तलंसि सव्वंगेहिं धसत्ति पडिया ।

तए णं सा देवई देवी ससंभमोवत्तियाए तुरियं कंचणभिंंगारमुहविणिग्गय -सीयल-जलविमल-
धाराए परिसिंचमाणणिव्वावियगायलद्धी उक्खेवय- तालविंट वीयणग-जणियवाएणं सफुसिएणं
अंतेउरपरिजणेणं आसासिया समाणी मुत्तावलि-सण्णिगास-पवडंत-अंसुधाराहिं सिंचमाणी पओहरे,
कलुण-विमण-दीणा रोयमाणी कंदमाणी तिप्पमाणी सोयमाणी विलवमाणी गयसुकुमालं कुमारं
एवं वयासी-

तुमं सि णं जाया ! अम्हं एगे पुत्ते इट्ठे कंते पिए मणुण्णे मणामे धेज्जे वेसासिए सम्मए
बहुमए अणुमए भंडकरंडगसमाणे रयणे रयणभूए जीविय- ऊसासिए हियय-णंदि-जणणे
उंबरपुप्फंव दुल्लहे सवणयाए, किमंग पुण पासणयाए ? णो खलु जाया! अम्हे इच्छामो
खणमवि विप्पओगं सहित्तए । तं भुंजाहि ताव जाया विपुले माणुस्सए कामभोगे जाव ताव
वयं जीवामो ! तओ पच्छा अम्हेहिं कालगएहिं परिणयवए वड्ढिय-कुलवंसतंतु-कज्जम्मि
णिरावयक्खे अरहओ अरिद्धणेमिस्स अंतिए मुंडे भवित्ता अगाराओ अणगारियं पव्वइस्ससि ।

२०

तए णं से गयसुकुमाले अम्मापिऊहिं एवं वुत्ते समाणे अम्मापियरो एवं वयासी- तहेव णं तं
अम्मो ! जहेव णं तुब्भे ममं एवं वयह- तुमं सि णं जाया ! अम्हं एगे पुत्ते इट्ठे कंते जाव
पव्वइस्ससि । एवं खलु अम्मयाओ माणुस्सए भवे अधुवे अणितिए असासए
वसणसओवद्धवाभिभूते विज्जुलयाचंचले अणिच्चे जलबुब्बुयसमाणे कुसग्गजलबिंदुसण्णिभे
संझब्भरागसरिसे सुविणदंसणोवमे सडण-पडण-विद्धंसण-धम्मे पच्छा पुरं च णं
अवस्सविप्पजहणिज्जे । से के णं जाणइ अम्मयाओ ! के पुत्विं गमणाए के पच्छा गमणाए?
तं इच्छामि णं अम्मयाओ! तुब्भेहिं अब्भणुण्णाए समाणे जाव पव्वइत्तए ।

तए णं तं गयसुकुमाल कुमारं अम्मापियरो एवं वयासी- इमे य ते जाया! अज्जय-पज्जय-
पिउपज्जयागए सुबहुं हिरण्णे य सुवण्णे य कंसे य दूसे य मणिमोत्तिय-संख-सिल-प्पवाल-
रत्तरयण-संतसार-सावएज्जे य अलाहि जाव आसत्तमाओ कुलवंसाओ पगामं दाउं पगामं भोत्तुं
पगामं परिभाएउं । तं अणुहोही ताव जाया ! विपुलं माणुस्सगं इड्ढिसक्कारसमुदयं । तओ
पच्छा अणुभूयकल्लाणे जाव अरहओ अरिद्धणेमिस्स अंतिए मुंडे भवित्ता अगाराओ अणगारियं
पव्वइस्ससि ।

तए णं से गयसुकुमाले अम्मापियरं एवं वयासी- तहेव णं तं अम्मयाओ! जं णं तुब्भे ममं एवं
वयह- इमे ते जाया ! अज्जग-पज्जग-पिउपज्जयागए जाव पव्वइस्ससि । एवं खलु अम्मयाओ
! हिरण्णे य जाव सावएज्जे य अग्गिसाहिए चोरसाहिए रायसाहिए दाइयसाहिए मच्चुसाहिए,
अग्गिसामण्णे चोरसामण्णे रायसामण्णे दाइयसामण्णे मच्चुसामण्णे सडण-पडण-विद्धंसणधम्म
पच्छा पुरं च णं अवस्स विप्पजहणिज्जे । से के णं जाणइ अम्मयाओ ! किं पुत्विं गमणाए ?
के पच्छा गमणाए ? तं इच्छामि णं अम्मयाओ ! तुब्भेहिं अब्भणुण्णाए समाणे जाव
पव्वइत्तए ।

तए णं तस्स गयसुकुमालस्स कुमारस्स अम्मापियरो जाहे णो संचाएंति गयसुकुमालं कुमारं
बहूहिं विसयाणुलोमाहिं आघवणाहि य पण्णवणाहि य सण्णवणाहि य विण्णवणाहि य

आघवित्तए वा पण्णवित्तए वा सण्णवित्तए वा विण्णवित्तए वा ताहे विसयपडिकूलाहिं संजमभउव्वेयकारियाहिं पण्णवणाहिं पण्णवेमाणा एवं वयासी-

२१

एस णं जाया ! णिग्गंथे पावयणे सच्चे अणुत्तरे केवल्लिए पडिपुण्णे णेयाउए संसुद्धे सल्लकत्तणे सिद्धिमग्गे मुत्तिमग्गे णिज्जाणमग्गे णिव्वाणमग्गे सव्वदुक्खपहीणमग्गे, अहीव एगंतदिट्ठीए, खुरो इव एगंतधाराए, लोहमया इव जवा चावेयव्वा, वालुयाकवले इव णिस्साए, गंगा इव महाणई पडिसोयगमणाए, महासमुद्धो इव भुयाहिं दुत्तरे, तिक्खं कमियव्वं, गरुअं लंबेयव्वं, असिधारव्वयं चरियव्वं ।

णो खलु कप्पइ जाया ! समणाणं णिग्गंथाणं आहाकम्मिए वा उद्देसिए वा कीयगडे वा ठविए वा रइए वा दुब्भिकखभत्ते वा कंतारभत्ते वा बद्धलियाभत्ते वा गिलाणभत्ते वा मूलभोयणे वा कंदभोयणे वा फलभोयणे वा बीयभोयणे वा हरियभोयणे वा भोत्तए वा पायए वा ।

तुमं च णं जाया ! सुहसमुचिए णो चेव णं दुहसमुचिए, णालं सीयं णालं उण्हं णालं खुहं णालं पिवासं णालं वाइय-पित्तिय-सिंभिय-सण्णिवाइए विविहे रोगायंके, उच्चावए गामकंटए, बावीसं परीसहोवसग्गे उदिण्णे सम्मं अहिया-सित्तए । तं भुंजाहि ताव जाया ! माणुस्सए कामभोगे! तओ पच्छा भुत्तभोगी जाव पव्वइस्ससि ।

तए णं से गयसुकुमाले कुमारे अम्मापिऊहिं एवं वुत्ते समाणे अम्मापियरं एवं वयासी-तहेव णं तं अम्मयाओ ! जं णं तुब्भे ममं एवं वयह- एस णं जाया ! णिग्गंथे पावयणे सच्चे अणुत्तरे पुणरवि तं चेव जाव तओ पच्छा भुत्तभोगी अरहओ अरिद्वणेमिस्स अंतिए मुंडे भवित्ता अगाराओ अणगारियं पव्वइस्ससि। एवं खलु अम्मयाओ ! णिग्गंथे पावयणे कीवाणं कायराणं कापुरिसाणं इहलोग पडिबद्धाणं परलोगणिप्पिवासाणं दुरणुचरे पाययजणस्स, णो चेव णं धीरस्स । णिच्छियववसियस्स एत्थ किं दुक्करं करणायाए ? तं इच्छामि णं अम्मयाओ ! तुब्भेहिं अब्भणुण्णाए समाणे जाव पव्वइत्तए ।

२२

तए णं से कण्हे वासुदेवे इमीसे कहाए लद्धट्ठे समाणे जेणेव गयसुकुमाले तेणेव उवागच्छइ, उवागच्छित्ता गयसुकुमालं आलिंङ्गइ, आलिंङ्गित्ता उच्छंगे णिवेसेइ, णिवेसेत्ता एवं वयासी- तुमं ममं सहोयरे कणीयसे भाया । तं मा णं तुमं देवाणुप्पिया ! इयाणिं अरहओ अरिद्वणेमिस्स अंतिए मुंडे जाव पव्वयाहि । अहण्णं तुमे बारवईए णयरीए महया-महया रायाभिसेएणं अभिसिंचिस्सामि । तए णं से गयसुकुमाले कण्हेणं वासुदेवेणं एवं वुत्ते समाणे तुसिणीए संचिद्धइ । तए णं से गयसुकुमाले कण्हं वासुदेवं अम्मापियरो य दोच्चं पि तच्चंपि एवं वयासी-

एवं खलु देवाणुप्पिया ! माणुस्सया कामा भोगा असुई वंतासवा पित्तासवा खेलासवा सुक्कासवा सोणियासवा दुरूय-उस्सास-णीसासा दुरूय-मुत्त पुरीस-पूय-बहुपडिपुण्णा उच्चार-पासवण-खेल-सिंघाणग- वंत-पित्त-सुक्क सोणियसंभवा अधुवा अणितिया असासया सडण- पडण-विद्धंसणधम्मा पच्छा पुरं च णं अवस्स विप्पजहियव्वा भविस्संति, तं इच्छामि णं देवाणुप्पिया! तुब्भेहिं अब्भणुण्णाए समाणे जाव पव्वइत्तए ।

२३

तए णं गयसुकुमालं कण्हे वासुदेवे अम्मापियरो य जाहे णो संचाएंति बहुयाहिं अणुलोमाहिं जाव आघवित्तए ताहे अकामाइं चेव गयसुकुमालं कुमारं एवं वयासी- तं इच्छामो णं ते जाया ! एगदिवसमवि रज्जसिरिं पासित्तए ।

तए णं गयसुकुमाले कुमारे कण्हं वासुदेवं अम्मापियरं च अणुवत्तमाणे तुसिणीए संचिद्धइ । तए णं से गयसुकुमालस्स पिया कोडुंबियपुरिसे सद्दावेइ, सद्दावित्ता एवं वयासी- खिप्पामेव भो देवाणुप्पिया ! गयसुकुमालस्स कुमारस्स महत्थं, महग्घं, महरिहं विपुलं रायाभिसेयं उवड्ढवेह । तए णं ते कोडुंबियपुरिसा तहेव जाव पच्चप्पिणंति ।

तए णं तं गयसुकुमालं कुमारं अम्मा-पियरो सीहासणवरंसि पुरत्थाभिमुहं णिसीयावेंति जहा रायप्पसेणइज्जे जाव अड्डसएणं सोवणियाणं कलसाणं सत्विड्ढीए जाव महयारवेणं महया महया रायाभिसेएणं अभिसिंचंति अभिसिंचित्ता करयल जाव जएणं विजएणं वद्धावेंति, जएणं विजएणं वद्धावित्ता एवं वयासी- भण जाया ! किं देमो, किं पयच्छामो, किणा वा ते अड्डो ?

तए णं से गयसुकुमाले कुमारे अम्मापियरो एवं वयासी- इच्छामि णं अम्मयाओ कुत्तियावणाओ रयहरणं च पडिग्गहं च आणित्तं, कासवगं च सद्दावित्तं ।

२४

तए णं गयसुकुमालस्स कुमारस्स अम्मापियरो कोडुंबियपुरिसे सद्दावेंति, सद्दावित्ता एवं वयासी- खिप्पामेव भो देवाणुप्पिया ! सिरिधराओ तिण्णि सयसहस्साइं गहाय दोहिं सयसहस्सेहिं रयहरणं पडिग्गहं च उवणेह, सयसहस्सेण कासवगं सद्दावेह । तए णं ते कोडुंबियपुरिसा गयसुकुमालस्स कुमारस्स पिउणा एवं वुत्ता समाणा हट्ठतुट्ठ करयल जाव पडिसुणेत्ता खिप्पामेव सिरिधराओ तिण्णिसयसहस्साइं, तहेव जाव कासवगं सद्दावेंति । तए णं से कासवए गय सुकुमालस्स पिउणा कोडुंबियपुरिसेहिं सद्दाविए समाणे हट्ठतुट्ठे ण्हाए जाव विभूसिए जाव उवागच्छइ, उवागच्छित्ता करयल परिग्गहियं गयसुकुमालस्स कुमारस्स पियरं जएणं विजएणं वद्धावेइ, वद्धावित्ता एवं वयासी- संदिसंतु णं देवाणुप्पिया ! जं मए करणिज्जं ? तए णं से गयसुकुमालस्स पिया तं कासवगं एवं वयासी- तुमं देवाणुप्पिया ! गयसुकुमालस्स कुमारस्स परेणं जत्तेणं चउरंगुलवज्जे णिक्खमणपाओग्गे अग्गकेसे कप्पेहि । तए णं से कासवे एवं वुत्ते समाणे हट्ठतुट्ठकरयल जाव एवं सामी ! तहत्ति आणाए विणएणं वयणं पडिसुणेइ, पडिसुणित्ता सुरभिणा गंधोदएणं हत्थपाए पक्खालेइ, पक्खालित्ता सुद्धाए अड्डपडलाए पोत्तीए मुहं बंधइ, मुहं बंधित्ता गयसुकुमालस्स कुमारस्स परेणं जत्तेणं चउरंगुलवज्जे णिक्खमणपाओग्गे अग्गकेसे कप्पेइ ।

तए णं सा गयसुकुमालस्स कुमारस्स माया देवई देवी हंसलक्खणेणं पडसाडएणं अग्गकेसे पडिच्छइ, अग्गकेसे पडिच्छित्ता सुरभिणा गंधोदएणं पक्खालेइ, सुरभिणा गंधोदएणं पक्खालित्ता अग्गेहिं वरेहिं गंधेहिं, मल्लेहिं अच्छेइ, अग्गेहिं वरेहिं, गंधेहिं, मल्लेहिं अच्छित्ता सुद्धे वत्थे बंधइ, सुद्धे वत्थे बंधित्ता रयणकरंडगंसि पक्खिवइ, पक्खिवित्ता हार-वारिधार-सिंदुवार-छिण्णमुत्तावलिप्पगासाइं सुयवियोग-दूसहाइं अंसूइं विणिम्मयमाणी विणिम्मयमाणी एवं वयासी- एस णं अम्हं गयसुकुमालस्स कुमारस्स बहुसु तिहीसु य पव्वणीसु य उस्सवेसु य जण्णेसु य छणेसु य अपच्छिमे दरिसणे भविस्सइ त्ति कट्ठु ऊसीसगमूले ठवेइ ।

२५

तए णं तस्स गयसुकुमालस्स अम्मापियरो दोच्चं पि उत्तरावक्कमणं सीहासणं रयावेंति, रयावित्ता गयसुकुमालस्स कुमारस्स सेयापीयएहिं कलसेहिं ण्हावेंति ण्हावित्ता पम्हलसुकुमालाए सुरभीए गंधकासाईए गायाइं लूहेंति, लूहित्ता सरसेणं गोसीसचंदणेणं गायाइं अणुलिंपंति अणुलिंपित्ता णासाणिस्सासवायवोज्झं, चक्खुहरं, वण्ण-फरिसजुत्तं, हयलालापेलवाऽइरेगं, धवलं, कणगखचि-तंतकम्मं, महरिहं, हंसलक्खणपडसाडगं परिहिंति, परिहित्ता हारं पिणद्धेंति, पिणद्धित्ता अद्धहारं पिणद्धेंति, पिणद्धित्ता एवं जहा सूरियाभस्स अलंकारो तहेव जाव चित्तं रयण- संकडुक्कडं मउडं

पिण्डेति; किं बहुणा ? गंधिम- वेढिम-पूरिम संघाडमेणं चउव्विहेणं मल्लेणं कप्परुक्खगं पिव अलंकिय- विभूसियं करेति ।

२६

तए णं तस्स गय कुमालस्स पिया कोडुंबियपुरिसे सद्दावेइ, सद्दावित्ता एवं वयासी-खिप्पामेव भो देवाणुप्पिया ! अणेगखंभसयसण्णिविद्धं, लीलद्विय- सालभंजियागं जहा रायप्पसेणइज्जे विमाणवण्णओ जाव मणिरयण- घंटियाजालपरिक्खित्तं पुरिससहस्सवाहिणिं सीयं उवढ्वेह, उवढ्वेत्ता मम एयमाणत्तियं पच्चप्पिणह । तए णं ते कोडुंबियपुरिसा जाव पच्चप्पिणंति ।

तए णं से गयसुकुमाले कुमारे केसालंकारेणं, वत्थालंकारेणं, मल्लालं- कारेणं, आभरणालंकारेणं चउव्विहेणं अलंकारेणं अलंकारिए समाणे पडिपुण्णालंकारे सीहासणाओ अब्भुद्धेइ सीहासणाओ अब्भुद्धित्ता सीयं अणुप्पयाहिणीकरेमाणे सीयं दुरुहइ, दुरुहित्ता सीहासणवरंसि पुरत्थाऽभिमुहे सण्णिसण्णे ।

तए णं तस्स गयकुमारस्स माया ण्हाया जाव विभूसिय सरीरा हंसलक्खणे पडसाडगं गहाय सीयं अणुप्पयाहिणीकरेमाणी सीयं दुरुहइ, दुरुहित्ता गयसु- कुमालस्स कुमारस्स दाहिणे पासे भद्दासणवरंसि सण्णिसण्णा । तए णं तस्स गयसुकुमालस्स कुमारस्स अम्मधार्इ ण्हाया जाव विभूसिय सरीरा, रयहरणं पडिग्गहं च गहाय सीहं अणुप्पयाहिणीकरेमाणी सीयं दुरुहइ, दुरुहित्ता गयसु- कुमालस्स कुमारस्स वामे पासे भद्दासणवरंसि सण्णिसण्णा । तए णं तस्स गयसुकुमालस्स पिद्धओ एगा वरतरुणी सिंगारागारचारुवेसा संगयगय जाव रूव-जोव्वण- विलासकलिया, हिम-रयय-कुमुद-कुंदेदुप्पगासं सकोरंट- मल्लदामं धवलं आयवत्तं गहाय सलीलं उवरिं धारेमाणी धारेमाणी चिद्धइ । तए णं तस्स गयसुकुमालस्स उभओ पासिं दुवे वरतरुणीओ सिंगारागारचारु जाव कलियाओ, णाणामणि-कणग-रयण-विमलमहरिहतवणिज्जुज्ज- लविचित्त- दंडाओ, चिल्लियाओ, संखंक-कुंदेदुदगरय-अमयमहियफेण- पुंजसण्णिकासाओ धवलाओ चामराओ गहाय सलीलं वीयमाणीओ वीयमाणीओ चिद्धंति । तए णं तस्स गयसुकुमालस्स उत्तरपुरत्थिमेणं एगा वरतरुणी सिंगारगार जाव कलिया सेयं रययामयं विमलसलिलपुण्णं मत्तगयमहामुहा- किइसमाणं भिंगारं गहाय चिद्धइ । तए णं तस्स गयसुकुमालस्स दाहिणपुरत्थिमेणं एगा वरतरुणी सिंगारागार जाव कलिया चित्तकणगदंडं तालवेंटं गहाय चिद्धइ ।

२७

तए णं तस्स गयसुकुमाल-कुमारस्स पिया कोडुंबियपुरिसे सद्दावेइ, सद्दावित्ता एवं वयासी- खिप्पामेव भो देवाणुप्पिया ! सरिसयं, सरित्तयं, सरिव्वयं, सरिसलावण्ण-रूव-जोव्वण-गुणोववेयं, एगाभरण- वसणगहियणि ज्जोयं कोडुंबिय वरतरुणसहस्सं सद्दावेइ । तए णं ते कोडुंबियपुरिसा जाव पडिसुणित्ता खिप्पामेव सरिसयं सरित्तयं जाव सद्दावेति । तए णं ते कोडुंबियपुरिसा हट्ठुट्ठ ण्हाया जाव एगाभरण-वसण-गहिय- णिज्जोया जेणेव गयसुकुमालस्स पिया तेणेव उवागच्छंति, उवागच्छित्ता करयल जाव वद्दावित्ता एवं वयासी- संदिसंतु णं देवाणुप्पिया ! जं अम्हेहिं करणिज्जं । तए णं से गयसुकुमालस्स पिया तं कोडुंबियवरतरुणसहस्सं पि एवं वयासी- तुब्भे णं देवाणुप्पिया ! ण्हाया जाव गहियणिज्जोआ गयसुकुमालस्स कुमारस्स सीयं परिवहेह । तए णं ते कोडुंबियपुरिसा गयसुकुमालस्स जाव पडिसुणित्ता ण्हाया जाव गहिय- णिज्जोआ गयसुकुमालस्स कुमारस्स पुरिससहस्स वाहिणिं सीयं परिवहंति ।

तए णं गयसुकुमालस्स कुमारस्स पुरिससहस्सवाहिणिं सीयं दुरूढस्स समाणस्स तप्पढमयाए इमे अट्ठमंगलगा पुरओ अहाणुपुव्वीए संपट्ठिया; तं जहा- सोवत्थिय-सिरिवच्छ णंदियावत्त वद्धमाणग भद्दासण कलस मच्छ दप्पणा; तयाणंतरं च णं पुण्णकलसभिंजारं जहा उववाइए जाव गगणतलमणुलिहंती पुरओ अहाणुपुव्वीए संपट्ठिया; जाव आलोयं च करेमाणा जयजयसद्धं च पउंजमाणा पुरओ अहाणुपुव्वीए संपट्ठिया । तयाणंतरं च णं बहवे उग्गा भोगा जहा उववाइए जाव महापुरिसवग्गुरा-परिक्खित्ता, गयसुकुमालस्स कुमारस्स पुरओ य मग्गओ य पासओ य अहाणुपुव्वीए संपट्ठिया ।

तए णं से गयसुकुमालस्स कुमारस्स पिया ण्हाए जाव विभूसिएहत्थिखंध-वरगए सकोरंटमल्लदामेणं छत्तेणं धरिज्जमाणेणं सेयवरचामराहिं उद्धुव्वमाणीहिं हय-गय-रह-पवरजोह-कलियाए चाउरंगिणीए सेणाए सद्धिं संपरिवुडे, महयाभड चडगर जाव परिक्खित्ते गयसुकुमालस्स कुमारस्स पिट्ठओ अणुगच्छइ ।

तए णं तस्स गयसुकुमालस्स कुमारस्स पुरओ महं आसा आसवरा, उभओ पासिं णागा णागवरा, पिट्ठओ रहा रहसंगेल्ली । तए णं से गयसुकुमालकुमारे अब्भुग्गयभिंजारे, परिगहियतालियंटे, ऊसवियसेयछत्ते, पवीइयसेयचामरबालवीयणाए सत्विइदीए जाव णाइयरवेणं, तयाणंतरं च बहवे लट्ठिग्गाहा कुंतग्गाहा जाव सत्थवाह-प्पभिइओ पुरओ संपट्ठिया बारवईए णयरीए मज्झंमज्झेणं जेणेव अरहओ अरिद्वणेमि तेणेव पहारेत्थ गमणाए ।

तए णं तस्स गयसुकुमाल-कुमारस्स बारवईए णयरीए मज्झंमज्झेणं णिग्गच्छ-माणस्स सिंघाडगतिय-चउक्क जाव पहेसु बहवे अत्थिया जाव उववाइए जाव अभिणंदंता य अभित्थुणंता य एवं वयासी- जय जय णंदा ! धम्मेणं, जय जय णंदा ! तवेणं, जय जय णंदा ! भद्धं ते अभग्गेहिं णाण-दंसण- चरित्तमुत्तमेहिं, अजियाइं जिणाहि इंदियाइं, जियं च पालेहि समणधम्मं; जियविग्घो वि य वसाहि तं देव ! सिद्धिमज्झे, णिहणाहि य राग-दोसमल्ले, तवेणं धिइधणियबद्धकच्छे, मद्दाहि य अट्ठ कम्मसत्तू झाणेणं उत्तमेणं सुक्केणं, अप्पमत्तो हराहि आराहणपडागं च धीर ! तेलोक्करंगमज्झे, पावय वितिमिरमणुत्तरं केवलं च णाणं, गच्छ य मोक्खं परं पदं जिणवरोवदिद्वेणं सिद्धिमग्गेणं अकुडिलेणं, हंता परीसहचमुं, अभिभविय गामकंटकोवसग्गाणं, धम्मं ते अविग्घमत्थु, त्ति कट्ठु अभिणंदंति य अभिथुणंति य ।

तए णं से गयसुकुमाले कुमारे बारवईए णयरीए मज्झंमज्झेणं णिग्गच्छइ, णिग्गच्छित्ता जेणेव सहस्संबवणे उज्जाणे तेणेव उवागच्छइ उवागच्छित्ता छत्ताईए तित्थगराइसेए पासइ, पासित्ता पुरिससहस्सवाहिणिं सीयं ठवेइ, पुरिससहस्स वाहिणीओ सीयाओ पच्चोरुहइ । तए णं तं गयसुकुमालं कुमारं अम्मापियरो पुरओ काउं जेणेव अरहा अरिद्वणेमि तेणेव उवागच्छंति, उवागच्छित्ता अरहं अरिद्वणेमिं तिक्खुत्तो जाव णमंसित्ता एवं वयासी- एवं खलु भंते ! गयसुकुमाले कुमारे जाव अम्हं एगे पुत्ते इद्वे कंते जाव किमंग ! पुण पासणयाए, से जहाणामए उप्पलेइ वा, पउमेइ वा जाव सहस्सपत्तेइ वा पंके जाए जले संवुड्ढे णोवलिप्पइ पंकरएणं, णोवलिप्पइ जलरएणं, एवामेव गयसु- कुमाल कुमारे कामेहिं जाए, भोगेहिं संवुड्ढे णोवलिप्पइ कामरएणं णोवलिप्पइ भोगरएणं णोवलिप्पइ मित्तणाइ णियग- सयण-संबंधि परिजणेणं । एस णं देवाणुप्पिया ! संसारभयुव्विग्गे भीए जम्मण-मरणेणं; देवाणुप्पियाणं अंतिए मुंडे भवित्ता

अगाराओ अणगारियं पव्वएइ; तं एयं णं देवाणुप्पियाणं अम्हे सीसभिकखं दलयामो, पडिच्छंतु णं देवाणुप्पिया ! सीसभिकखं ।

३१

तए णं अरहा अरिद्वणेमि गयसुकुमालं कुमारं एवं वयासी- अहासुहं देवाणुप्पिया ! मा पडिबंधं। तए णं से गयसुकुमाले कुमारे अरहया अरिद्वणेमिणा एवं वुत्ते समाणे हट्ठतुट्ठे अरहं अरिद्वणेमिं तिकखुत्तो जाव णमंसित्ता उत्तर-पुरत्थिमं दिसिभागं अवक्कमइ, अवक्कमित्ता सयमेव आभरणमल्लालंकारं ओमुयइ । तए णं सा गयसुकुमाल-कुमारस्स माया हंसलक्खणेणं पडसाडएणं आभरणमल्लालंकारं पडिच्छइ पडिच्छित्ता हार-वारि जाव विणिम्मयमाणी विणिम्मयमाणी गयसुकुमालं कुमारं एवं वयासी-घडियव्वं जाया ! जइयव्वं जाया ! परिककमियव्वं जाया ! अस्सिं च णं अट्ठे, णो पमाएयव्वं ति कट्ठु गयसुकुमालस्स कुमारस्स अम्मपियरो अरिद्वणेमिं वंदंति णमंसंति, वंदित्ता णमंसित्ता जामेव दिसं पाउब्भूया तामेव दिसं पडिगया ।

तए णं गयसुकुमाले कुमारे सयमेव पंचमुट्ठियं लोयं करेइ, करित्ता जेणेव अरिद्वणेमि तेणेव उवागच्छइ, उवागच्छित्ता भगवं अरिद्वणेमिं तिकखुत्तो आयाहिणं पयाहिणं करेइ, करित्ता जाव णमंसित्ता एवं वयासी-

३२

आलित्ते णं भंते ! लोए, पलित्ते णं भंते ! लोए, आलित्त-पलित्ते णं भंते ! लोए जराए मरणेण य । से जहाणामए केई गाहावई अगारंसि झियायमाणंसि, जे से तत्थ भंडे भवइ अप्पभारे मोल्लगुरुए, तं गहाय आयाए एगंतं अवक्कमइ एस मे णित्थारिए समाणे पच्छा पुरा य हियाए सुहाए खेमाए णिस्सेयसाए आणुगामियत्ताए भविस्सइ । एवामेव देवाणुप्पिया! मज्झ वि एगे आया भंडे इट्ठे कंते पिए मणुण्णे मणामे धेज्जे वेस्सासिए संमए अणुमए बहुमए भंडकरंडगसमाणे, मा णं सीयं, मा णं उण्हं, मा णं खुहा, मा णं पिवासा, मा णं चोरा, माणं वाला, मा णं दंसा, माणं मसगा, मा णं वाइयपित्तिय- संभिय-सण्णिवाइया विविहा रोगायंका परीसहोवसग्गा फुसंतु त्ति कट्ठु एस मे णित्थारिए समाणे परलोयस्स हियाए सुहाए खेमाए णीसेसाए आणुगामियत्ताए भविस्सइ । तं इच्छामि णं देवाणुप्पिया ! सयमेव पव्वावियं, सयमेव मुंडावियं, सयमेव सेहावियं, सयमेव सिक्खावियं, सयमेव आया- गोयरं विणयवेणइय- चरण-करण-जाया-मायावत्तियं धम्ममाइक्खियं ।

तए णं अरिद्वणेमी अरहा गयसुकुमालं कुमारं सयमेव पव्वावेइ जाव धम्ममाइक्खइ-एवं देवाणुप्पिया ! गंतव्वं, एवं चिद्धियव्वं, एवं णिसीयव्वं, एवं तुयट्ठियव्वं, एवं भुंजियव्वं, एवं भासियव्वं, एवं उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमियव्वं, अस्सिं च णं अट्ठे णो किंचि पि पमाइयव्वं। तए णं से गयसुकुमाले कुमारे अरहओ अरिद्वणेमिस्स इमं एयारूवं धम्मियं उवएसं सम्मं संपडिवज्जइ, तमाणाए तहा गच्छइ, तह चिट्ठइ, तह णिसीयइ, तह तुयट्ठइ, तह भुंजइ, तह भासइ, तह उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमेइ । तए णं से गयसुकुमाले अणगारे जाए ईरियासमिए भासासमिए एसणासमिए आयाणभंडमत्तणिकखेवणासमिए उच्चार-पासवण-खेल-जल्ल सिंघाणपरिद्धावणियासमिए मणसमिए वयसमिए कायसमिए मणगुत्ते वयगुत्ते कायगुत्ते गुत्तिंदिए गुत्तबंभयारी, इणमेव णिग्गंथं पावयणं पुरओ काउं विहरइ ।

३३

तए णं से गयसुकुमाले जं चेव दिवसं पव्वइए तस्सेव दिवसस्स पुव्वावरण्हकालसमयंसि जेणेव अरहा अरिद्वणेमी तेणेव उवागच्छइ, उवागच्छित्ता अरहं अरिद्वणेमिं तिक्खुत्तो आयाहिणं पयाहिणं करेइ, करेत्ता वंदइ, णमंसइ, वंदित्ता णमंसित्ता एवं वयासी-
इच्छामि णं भंते ! तुब्भेहिं अब्भणुण्णाए समाणे महाकालंसि सुसाणंसि एगराइयं महापडिमं उवसंपज्जित्ताणं विहरित्तए ।

अहासुहं देवाणुप्पिया ! मा पडिबंधं करेह ।

तए णं से गयसुकुमाले अणगारे अरहया अरिद्वणेमिणा अब्भणुण्णाए समाणे अरहं अरिद्वणेमिं वंदइ णमंसइ, वंदित्ता णमंसित्ता अरहओ अरिद्वणेमिस्स अंतिए सहसंबवणाओ उज्जाणाओ पडिणिक्खमइ, पडिणिक्खमित्ता जेणेव महाकाले सुसाणे तेणेव उवागए, उवागच्छित्ता थंडिल्लं पडिलेहेइ, पडिलेहेत्ता उच्चारपासवणभूमिं पडिलेहेइ, पडिलेहेत्ता ईसिं पब्भारगएणं कारणं वग्घारियपाणी अणिमिसणयणे एक्कपोग्गल-णिरुद्धदिट्ठी दोवि पाए साहट्ठु एगराइं महापडिमं उवसंपज्जित्ता णं विहरइ ।

३४

इमं च णं सोमिले माहणे सामिधेयस्स अट्ठाए बारवईओ णयरीओ बहिया पुव्वणिग्गए समिहाओ य दब्भे य कुसे य पत्तामोडं य गेण्हइ, गेण्हित्ता तओ पडिणियत्तइ, पडिणियत्तित्ता महाकालस्स सुसाणस्स अदूरसामंतेणं वीईवयमाणे वीईवयमाणे संझाकालसमयंसि पविरलमणुस्संसि गयसुकुमालं अणगारं पासइ, पासित्ता तं वेरं सरइ, सरित्ता आसुरुत्ते रुढे कुविए चंडिकिए मिसिमिसेमाणे एवं वयासी-

एस णं भो ! से गयसुकुमाले कुमारे अपत्थिय पत्थिए, दुरंत-पंत लक्खणे, हीणपुण्णचाउद्धसिए, सिरि-हिरि-धिइ-कित्ति परिवज्जिए, जे णं मम धूयं सोमसिरीए भारियाए अत्तयं सोमं दारियं अदिट्ठदोसपत्तियं कालवत्तिणिं विप्पजहित्ता मुंडे जाव पव्वइए । तं सेयं खलु मम गयसुकुमालस्स कुमारस्स वेरणिज्जायणं करेत्तए; एवं संपेहेइ, संपेहेत्ता दिसापडिलेहणं करेइ, करेत्ता सरसं मट्ठियं गेण्हइ, गेण्हित्ता जेणेव गयसुकुमाले अणगारे तेणेव उवागच्छइ, उवागच्छित्ता गयसुकुमालस्स अणगारस्स मत्थए मट्ठियाए पालिं बंधइ, बंधित्ता जलंतीओ चिययाओ फुल्लियकिंसुयसमाणे खइरिंगाले कहल्लेणं गेण्हइ, गेण्हित्ता गयसुकुमालस्स अणगारस्स मत्थए पक्खिवइ, पक्खिवित्ता भीए तत्थे तसिए उव्विग्गे संजायभए तओ खिप्पामेव अवक्कमइ, अवक्कमित्ता जामेव दिसं पाउब्भूए तामेव दिसं पडिगए ।

३५

तए णं तस्स गयसुकुमालस्स अणगारस्स सरीरयंसि वेयणा पाउब्भूया- उज्जला विउला कक्खडा पगाढा चंडा रुद्धा दुक्खा दूरहियासा । तए णं से गयसुकुमाले अणगारे सोमिलस्स माहणस्स मणसा वि अप्पदुस्समाणे तं उज्जलं विउलं कक्खडं पगाढं चंडं रुद्धं दुक्खं दूरहियासं वेयणं अहियासेइ । तए णं तस्स गयसुकुमालस्स अणगारस्स तं उज्जलं जाव अहियासेमाणस्स सुभेणं परिणामेणं, पसत्थज्झवसाणेणं, तदावरणिज्जाणं कम्मणं खएणं कम्मरयविकिरणकरं अपुव्वकरणं अणुप्पविट्ठस्स अणंते अणुत्तरे णिव्वाघाए णिरावरणे कसिणे पडिपुण्णे केवलवर-णाणदंसणे समुप्पण्णे । तओ पच्छा सिद्धे बुद्धे मुत्ते अंतगडे परिणिव्वुए सव्वदुक्ख-प्पहीणे । तत्थ णं अहासण्णिहिएहिं देवेहिं सम्मं आराहिए त्ति कट्ठु दिव्वे सुरभिगंधोदए वुट्ठे; दसद्धवण्णे कुसुमे णिवाडिए; चेलुक्खेवे कए; दिव्वे य गीयगंधव्वणिणाए कए यावि होत्था ।

३६

तए णं से कण्हे वासुदेवे कल्लं पाउप्पभायाए रयणीए फुल्लुप्पल कमल- कोमलुम्मिलियम्मि, अहपंडुरे पभाए, रत्तासोगपगास-किंसुय-सुयमुह-गुंजद्धराग-बंधुजीवग-पारावयचलण-णयण-परहुयसुरत्तलोयण-जासुमणकुसुम जलियजलण-तवणिज्जकलस-हिंगुलयणियर-रूवाइरेगरेहंतसस्सिरीए दिवायरे अहक्कमेण उदिए, तस्स दिणकर-परंपरावयारपारद्धम्मि अंधयारे, बालातवकुंकुमेणं खइएव्व जीवलोए, लोयणविसआणुआसविगसंत- विसददंसियम्मि लोए, कमलागर संडबोहए उट्ठियम्मि सूरे सहस्सरस्सिम्मि दियगरे तेयसा जलंते ण्हाए जाव विभूसिए हत्थिखंधवरगए, सकोरैटमल्लदामेणं छत्तेणं धरिज्जमाणेणं सेयवरचामराहिं उद्धुव्वमाणीहिं महयाभड-चडगर- पहकरवंद-परिक्खित्ते बारवइं णयरिं मज्झंमज्झेणं जेणेव अरहा अरिद्वणेमी तेणेव पहारेत्थ गमणाए ।

तए णं से कण्हे वासुदेवे बारवइए णयरीए मज्झंमज्झेणं णिग्गच्छमाणे एक्कं पुरिसं-जुण्णं जराजज्जरियदेहं आउरं झूसियं पिवासियं दुब्बलं किलंतं महइमहालयाओ इट्ठगरासीओ एगमेगं इट्ठगं गहाय बहिया रत्थापहाओ अंतोगिहं अणुप्पविसमाणं पासइ ।

तए णं से कण्हे वासुदेवे तस्स पुरिसस्स अणुकंपणद्वाए हत्थिखंधवरगए चेव एगं इट्ठगं गेण्हइ, गेण्हित्ता बहिया रत्थापहाओ अंतोघरंसि अणुप्पवेसिए ।

तए णं कण्हेणं वासुदेवेणं एगाए इट्ठगाए गहियाए समाणीए अणेगेहिं पुरिसेहिं से महालए इट्ठगस्स रासी बहिया रत्थापहाओ अंतोघरंसि अणुप्पवेसिए ।

३७

तए णं से कण्हे वासुदेवे बारवइए णयरीए मज्झंमज्झेणं णिग्गच्छइ, णिग्गच्छित्ता जेणेव अरहा अरिद्वणेमी तेणेव उवागए, उवागच्छित्ता जाव वंदइ णमंसइ, वंदित्ता णमंसित्ता एवं वयासी- कहि णं भंते ! से ममं सहोयरे कणीयसे भाया गयसुकुमाले अणगारे जं णं अहं वंदामि णमंसामि ? तए णं अरहा अरिद्वणेमी कण्हं वासुदेवं एवं वयासी- साहिए णं कण्हा ! गयसुकुमालेणं अणगारेणं अप्पणो अट्ठे । तए णं से कण्हे वासुदेवे अरहं अरिद्वणेमिं एवं वयासी- कहण्णं भंते! गयसुकुमालेणं अणगारेणं साहिए अप्पणो अट्ठे ? तए णं अरहा अरिद्वणेमी कण्हं वासुदेवं एवं वयासी-एवं खलु कण्हा गयसुकुमाले णं अणगारे ममं कल्लं पुच्चावरण्हकालसमयंसि वंदइ णमंसइ, वंदित्ता णमंसित्ता एवं वयासी- इच्छामि णं जाव उवसंपज्जित्ता णं विहरइ ।

तए णं तं गयसुकुमालं अणगारं एगे पुरिसे पासइ, पासित्ता आसुरुत्ते जाव सिद्धे । तं एवं खलु कण्हा ! गयसुकुमालेणं अणगारेणं साहिए अप्पणो अट्ठे ।

३८

तए णं से कण्हे वासुदेवे अरहं अरिद्वणेमिं एवं वयासी- केस णं भंते! से पुरिसे अपत्थियपत्थिए दुरंत-पंत-लक्खणे, हीणपुण्णचाउद्दसिए, सिरि- हिरि- धिइ-कित्ति परिवज्जिए, जेणं ममं सहोयरं कणीयसं भायरं गजसुकुमालं अणगारं अकाले चेव जीवियाओ ववरोविए ? तए णं अरहा अरिद्वणेमि कण्हं वासुदेवं एवं वयासी- मा णं कण्हा ! तुमं तस्स पुरिसस्स पदोसमावज्जाहि । एवं खलु कण्हा ! तेणं पुरिसेणं गयसुकुमालस्स अणगारस्स साहिज्जे दिण्णे । कहण्णं भंते! तेणं पुरिसेणं गयसुकुमालस्स अणगारस्स साहिज्जे दिण्णे ? तए णं अरहा अरिद्वणेमि कण्हं वासुदेवं एवं वयासी- से णूणं कण्हा ! तुमं ममं पायवंदए हव्वमागच्छमाणे बारवइए णयरीए एगं पुरिसं जाव दुब्बलं किलंतं महइमहालयाओ इट्ठगरासीओ एगमेगं इट्ठगं गहाय बहिया रत्थापहाओ अंतोगिहं अणुप्पवेससि । तए णं तुमे एगाए इट्ठगाए गहियाए समाणीए अणेगेहिं

पुरिससएहिं से महालए इट्ठगस्स रासी बहिया रत्थापहाओ अंतोघरंसि अणुपवेसिए । जहा णं कण्हा ! तुमे तस्स पुरिसस्स साहिज्जे दिण्णे, एवामेव कण्हा ! तेणं पुरिसेणं गयसुकुमालस्स अणगारस्स अणेगभव-सयसहस्स-संचियं कम्मं उदीरेमाणेणं बहुकम्मणिज्जरत्थं साहिज्जे दिण्णे ।

३९ तए णं से कण्हे वासुदेवे अरहं अरिट्ठणेमिं एवं वयासी- से णं भंते ! पुरिसे मए कहां जाणियव्वे ? तए णं अरहा अरिट्ठणेमी कण्हं वासुदेवं एवं वयासी- जे णं कण्हा ! तुमं बारवईए णयरीए अणुप्पविसमाणं पासेत्ता ठियए चेव ठिइभेएणं कालं करिस्सइ, तण्णं तुमं जाणिज्जासि "एस णं से पुरिसे ।" तए णं से कण्हे वासुदेवे अरहं अरिट्ठणेमिं वंदइ णमंसइ, वंदित्ता णमंसित्ता जेणेव आभिसेयं हत्थिरयणं तेणेव उवागच्छइ, उवागच्छित्ता हत्थिं दुरुहइ, दुरुहित्ता जेणेव बारवई णयरी जेणेव सए गिहे तेणेव पहारेत्थ गमणाए ।

तए णं तस्स सोमिलमाहणस्स कल्लं जाव जलंते अयमेयारूवे अज्झत्थिए जाव मणोगए संकप्पे समुप्पण्णे- एवं खलु कण्हे वासुदेवे अरहं अरिट्ठणेमिं पायवंदए णिग्गए । तं णायमेयं अरहया, विण्णायमेयं अरहया, सुयमेयं अरहया, सिट्ठमेयं अरहया भविस्सइ कण्हस्स वासुदेवस्स । तं ण णज्जइ णं कण्हे वासुदेव ममं केणइ कुमारेणं मारिस्सइ त्ति कट्ठु भीए तत्थे तसिए उव्विग्गे संजाएभए सयाओ गिहाओ पडिणिक्खमइ । कण्हस्स वासुदेवस्स बारवइं णयरिं अणुप्पविसमाणस्स पुरओ सपक्खिं सपडिदिसिं हव्वमागए ।

तए णं से सोमिले माहणे कण्हं वासुदेवं सहसा पासेत्ता भीए तत्थे तसिए उव्विग्गे संजायभए ठियए चेव ठिइभेएणं कालं करेइ, धरणितलंसि सव्वंगेहिं "धस" त्ति सण्णिवडिए ।

४० तए णं से कण्हे वासुदेवे सोमिलं माहणं पासइ, पासित्ता एवं वयासी- एस णं भो ! देवाणुप्पिया ! से सोमिले माहणे अपत्थिय पत्थिए जाव हिरि सिरी परिवज्जिए, जेणं ममं सहोयरे कणीयसे भायरे गयसुकुमाले अणगारे अकाले चेव जीवियाओ ववरोविए त्ति कट्ठु सोमिलं माहणं पाणेहिं कइढावेइ, कइढावेत्ता तं भूमिं पाणिणं अब्भोक्खावेइ, अब्भोक्खावेत्ता जेणेव सए गिहे तेणेव उवागए । सयं गिहं अणुप्पविट्ठं ।

४१ एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स अट्ठमज्झयणस्स अयमट्ठे पण्णत्ते ।

॥ अट्ठमं अज्झयणं समत्तं ॥

तइओ वग्गो

९-१३ अज्झयणाणि

सुमुहादिकुमारा

१ जइ णं भंते ! समणेणं भगवया महावीरेणं अट्ठमस्स अंगस्स अंतगडदसाणं तच्चस्स वग्गस्स अट्ठमस्स अज्झयणस्स अयमट्ठे पण्णत्ते, णवमस्स णं भंते ! अज्झयणस्स के अट्ठे पण्णत्ते?

एवं खलु जंबू ! तेणं कालेणं तेणं समएणं बारवईए णयरीए कण्हे णामं वासुदेवे राया जहा पढमए जाव विहरइ । तत्थ णं बारवईए बलदेवे णामं राया होत्था, वण्णओ । तस्स णं बलदेवस्स रण्णो धारिणी णामं देवी होत्था, वण्णओ । तए णं सा धारिणी देवी सीहं सुविणे जहा गोयमे, णवरं सुमुहेकुमारे जाव वीसं वासाइं परियाओ । सेसं तं चेव सेत्तुंजे सिद्धे । एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स णवमस्स अज्झयणस्स अयमट्ठे पण्णत्ते । त्ति बेमि ॥

॥ तइओ वग्गो समत्तो ॥

चउत्थं वग्गो

१-१० अज्झयणाणि

जालिपभिइ कुमारा

१ जइ णं भंते ! समणेणं भगवया महावीरेणं जाव संपत्तेणं अंतगडदसाणं तच्चस्स वग्गस्स अयमट्ठे पण्णत्ते, चउत्थस्स वग्गस्स समणेणं भगवया महावीरेणं जाव संपत्तेणं के अट्ठे पण्णत्ते ?

एवं खलु जंबू ! समणेणं भगवया महावीरेणं जाव संपत्तेणं चउत्थस्स वग्गस्स दस अज्झयणा पण्णत्ता, तं जहा-

जालि, मयालि, उवयालि, पुरिससेणे, वारिसेणे य ।

पज्जुण्ण, संब, अणिरुद्ध, सच्चणेमि य, दढणेमी ॥१॥

जइ णं भंते ! समणेणं भगवया महावीरेणं जाव संपत्तेणं चउत्थस्स वग्गस्स दस अज्झयणा पण्णत्ता, पढमस्स णं अज्झयणस्स के अट्ठे पण्णत्ते ?

२ एवं खलु जंबू ! तेणं कालेणं तेणं समएणं बारवई णयरी । तीसे णं बारवईए णयरीए जहा पढमे जाव कण्हे वासुदेवे आहेवच्चं जाव विहरइ । तत्थ णं बारवईए णयरीए वसुदेवे राया । धारिणी देवी, वण्णओ । जहा गोयमो, णवरं जालिकुमारे । पण्णासओ दाओ । बारसंगी । सोलसवासा परियाओ । सेसं जहा गोयमस्स जाव सेत्तुंजे सिद्धे ।

३ एवं मयालि उवयालि पुरिससेणे य वारिसेणे य । एवं पज्जुण्णे वि, णवरं-कण्हे पिया, रुप्पिणी माया । एवं संबे वि, णवरं-जंबवई माया । एवं अणिरुद्धे वि, णवरं-पज्जुण्णे पिया, वेदब्भी माया । एवं सच्चणेमी, णवरं समुद्धविजए पिया, सिवा माया । एवं दढणेमी वि सव्वे एगगमा ॥ एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं चउत्थस्स वग्गस्स अयमट्ठे पण्णत्ते ।

॥ चउत्थो वग्गो समत्तो ॥

पंचमं वग्गो

पढमं अज्झयणं

पउमावई

१ जइ णं भंते ! समणेणं भगवया महावीरेणं जाव संपत्तेणं चउत्थस्स वग्गस्स अयमद्वे पण्णत्ते, पंचमस्स वग्गस्स अंतगडदसाणं समणेणं भगवया महावीरेणं जाव संपत्तेणं के अद्वे पण्णत्ते? एवं खलु जंबू ! समणेणं भगवया महावीरेणं जाव संपत्तेणं पंचमस्स वग्गस्स दस अज्झयणा पण्णत्ता, तं जहा-

पउमावई य, गोरी, गंधारी, लक्खणा, सुसीमा य ।

जंबवई, सच्चभामा, रुपिणी, मूलसिरि, मूलदत्ता वि ॥

जइ णं भंते ! समणेणं भगवया महावीरेणं जाव संपत्तेणं पंचमस्स वग्गस्स दस अज्झयणा पण्णत्ता, पढमस्स णं भंते ! अज्झयणस्स के अद्वे पण्णत्ते ?

एवं खलु जंबू ! तेणं कालेणं तेणं समएणं बारवई णयरी । जहा पढमे जाव कण्हे वासुदेवे आहेवच्चं जाव विहरइ । तस्स णं कण्हस्स वासुदेवस्स पउमावई णामं देवी होत्था, वण्णओ ।

२ तेणं कालेणं तेणं समएणं अरहा अरिद्वणेमी समोसढे अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे विहरइ । कण्हे वासुदेवे णिग्गए जाव पज्जुवासइ । तए णं सा पउमावई देवी इमीसे कहाए लद्धट्ठा समाणी हट्ठुट्ठा जहा देवई देवी जाव पज्जुवासइ । तए णं अरहा अरिद्वणेमी कण्हस्स वासुदेवस्स पउमावईए य देवीए जाव धम्मकहा । परिसा पडिगया।

३ तए णं से कण्हे वासुदेवे अरहं अरिद्वणेमिं वंदइ णमंसइ, वंदित्ता णमंसित्ता एवं वयासी- इमीसे णं भंते ! बारवईए णयरीए णवजोयणवित्थिण्णाए जाव देवलोगभूयाए किंमूलाए विणासे भविस्सइ? कण्हाइ ! अरहा अरिद्वणेमी कण्हं वासुदेवं एवं वयासी-एवं खलु कण्हा ! इमीसे बारवईए णयरीए णवजोयण-वित्थिण्णाए जाव देवलोगभूयाए सुरग्गिदीवायणमूलाए विणासे भविस्सइ ।

४ कण्हस्स वासुदेवस्स अरहओ अरिद्वेमिस्स अंतिए एवं सोच्चा णिसम्म अयं अज्झत्थिए चिंतिए पत्थिए मणोगए संकप्पे समुप्पज्जित्था- धण्णा णं ते जालि-मयालि उवयालि-पुरिससेण-वारिसेण-पज्जुण्ण-संब-अणिरुद्ध- सच्चणेमि दढणेमि- प्पभियओ कुमारा जे णं चइत्ता हिरण्णं चइत्ता सुवण्णं एवं धण्णं धणं बलं वाहणं कोसं कोट्ठागारं पुरं अंतेउरं चइत्ता विउलं धण- कणग-रयण-मणि-मोत्तिय-संख-सिलप्पवाल-संतसार-सावएज्जं विच्छइइत्ता विगोवइत्ता दाणं दाइयाणं परिभाइत्ता, अरहओ अरिद्वणेमिस्स अंतियं मुंडा भवित्ता अगाराओ अणगारियं पव्वइया । अहण्णं अधण्णे अकयपुण्णे रज्जे य रट्ठे य कोसे य कोट्ठागारे य बले य वाहणे य पुरे य अंतेउरे य माणुस्सएसु य कामभोगेसु मुच्छिए गढिए गिद्धे अज्झोववण्णे णो संचाएमि अरहओ अरिद्वणेमिस्स अंतिए मुंडे भवित्ता अगाराओ अणगारियं पव्वइत्तए ।

कण्हाइ ! अरहा अरिद्वणेमी कण्हं वासुदेवं एवं वयासी- से णूणं कण्हा ! तव अयं अज्झत्थिए चिंतिए पत्थिए मणोगए संकप्पे समुप्पज्जित्था- धण्णा णं ते जालिप्पभिइकुमारा जाव पव्वइया । से णूणं कण्हा ! अत्थे समत्थे ? हंता अत्थि।

तं णो खलु कण्हा ! एयं भूयं वा भव्वं वा भविस्सइ वा जण्णं वासुदेवा चइत्ता हिरण्णं जाव पव्वइस्संति ।

से केणद्वेणं भंते ! एवं वुच्चइ- ण एयं भूयं वा जाव पव्वइस्संति ?

कण्हाइ ! अरहा अरिद्वणेमी कण्हं वासुदेवं एवं वयासी- एवं खलु कण्हा ! सव्वे वि य णं वासुदेवा पुव्वभवे णियाणकडा से एतेणद्वेणं कण्हा ! एवं वुच्चइ ण एयं भूयं जाव पव्वइस्संति।

५

तए णं से कण्हे वासुदेवे अरहं अरिद्वणेमिं एवं वयासी- अहं णं भंते ! इओ कालमासे कालं किच्चा कहिं गमिस्सामि ? कहिं उववज्जिस्सामि ?

तए णं अरहा अरिद्वणेमी कण्हं वासुदेवं एवं वयासी- एवं खलु कण्हा ! तुमं बारवईए णयरीए सुरग्गि- दीवायण-कोव-णिदइद्दाए अम्मपिइ-णियग-विप्पहूणे रामेण बलदेवेण सद्धिं दाहिणवेयालिं अभिमुहे जुहिठिल्लपामोकखाणं पंचण्हं पंडवाणं पंडुरायपुत्ताणं पासे पंडुमहुरं संपत्थिए कोसंबवण काणणे णग्गोहवरपायवस्स अहे पुढविसिलापट्टए पीयवत्थपच्छाइयसरीरे जराकुमारेणं तिक्खेणं कोदंड- विप्पमुक्केणं उसुणा वामे पादे विद्धे समाणे कालमासे कालं किच्चा तच्चाए वालुयप्पभाए पुढवीए उज्जल्लिए णरए णेरइयत्ताए उववज्जिहिसि ।

६

तए णं से कण्हे वासुदेवे अरहओ अरिद्वणेमिस्स अंतिए एयमद्वं सोच्चा णिसम्म ओहय जाव झियाइ ।

कण्हाइ ! अरहा अरिद्वणेमी कण्हं वासुदेवं एवं वयासी- मा णं तुमं देवाणुप्पिया ! ओहयमणसंकप्पे जाव झियाह । एवं खलु तुमं देवाणुप्पिया ! तच्चाओ पुढवीओ उज्जल्लियाओ णरयाओ अणंतरं उव्वट्ठित्ता इहेव जंबुदीवे दीवे भारहे वासे आगमेसाए उस्सप्पिणीए पुंडेसु जणवएसु सयदुवारे णयरे बारसमे अममे णामं अरहा भविस्ससि । तत्थ तुमं बहूइं वासाइं केवलिपरियागं पाउणेत्ता सिज्झिहिसि बुज्झिहिसि मुच्चिहिसि परिणिव्वाहिसि सव्वदुक्खाणं अंतं काहिसि ।

तए णं से कण्हे वासुदेवे अरहओ अरिद्वणेमिस्स अंतिए एयमद्वं सोच्चा णिसम्म हट्ठतुट्ठे जाव अप्फोडेइ, अप्फोडेत्ता वग्गइ, वग्गित्ता तिवइं छिंदइ, छिंदित्ता सीहणायं करेइ, करेत्ता अरहं अरिद्वणेमिं वंदइ णमंसइ, वंदित्ता णमंसित्ता तमेव आभिसेक्कं हत्थिं दुरूहइ, दुरूहित्ता जेणेव बारवई णयरी, जेणेव सए गिहे तेणेव उवागए । आभिसेयहत्थिरयणाओ पच्चोरुहइ, पच्चोरुहित्ता जेणेव बाहिरिया उवट्ठाणसाला जेणेव सए सीहासणे तेणेव उवागच्छइ, उवागच्छित्ता सीहासणवरंसि पुरत्थाभिमुहे णिसीयइ, णिसीइत्ता कोडुंबियपुरिसे सद्दावेइ सद्दावित्ता एवं वयासी-

७

गच्छह णं तुब्भे देवाणुप्पिया ! बारवईए णयरीए सिंघाडग तिग चउक्क- चच्चर-चउम्मह- महापहपहेसु हत्थिखंधवरगया महया-महया सदेणं उग्घोसेमाणा उग्घोसेमाणा एवं वयह- एवं खलु देवाणुप्पिया ! बारवईए णयरीए णवजोयण जाव देवलोगभूयाए सुरग्गि-दीवायण-मूलाए विणासे भविस्सइ, तं जो णं देवाणुप्पिया ! इच्छइ बारवईए णयरीए राया वा जुवराया वा ईसरे वा तलवरे वा माडंबिय कोडुंबिय इब्भ सेट्ठी वा देवी वा कुमारो वा कुमारी वा अरहओ

अरिद्वणेमिस्स अंतिए मुंडे जाव पव्वइत्तए, तं णं कण्हे वासुदेवे विसज्जेइ । पच्छातुरस्स वि य से अहापवित्तं वित्तिं अणुजाणइ । महया इड्ढिसक्कारसमुदएण य से णिक्खमणं करेइ । दोच्चं पि तच्चं पि घोसयणं घोसेह, घोसित्ता ममं एयं आणत्तियं पच्चप्पिणह । तए णं ते कोडुंबिया जाव पच्चप्पिणंति ।

८ तए णं सा पउमावई देवी अरहओ अरिद्वणेमिस्स अंतिए धम्मं सोच्चा णिसम्म हट्ठुडु जाव हियया अरहं अरिद्वणेमिं वंदइ णमंसइ, वंदित्ता णमंसित्ता एवं वयासी- सद्धहामि णं भंते ! णिग्गंथं पावयणं, से जहेयं तुब्भे वयह । जं णवरं देवाणुप्पिया ! कण्हं वासुदेवं आपुच्छामि । तए णं अहं देवाणुप्पियाणं अंतिए मुंडा जाव पव्वयामि । अहासुहं देवाणुप्पिया ! मा पडिबंधं करेहि ।

तए णं सा पउमावई देवी धम्मियं जाणप्पवरं दुरुहइ, दुरुहित्ता, जेणेव बारवई णयरी जेणेव सए गिहे तेणेव उवागच्छइ, उवागच्छित्ता धम्मियाओ जाणप्पवराओ पच्चोरुहइ, पच्चोरुहित्ता जेणेव कण्हे वासुदेवे तेणेव उवागच्छइ, उवागच्छित्ता करयल परिग्गहियं दसणहं सिरसावत्तं मत्थए अंजलिं कट्ठु कण्हं वासुदेवं एवं वयासी- इच्छामि णं देवाणुप्पिया ! तुब्भेहिं अब्भणुण्णाया समाणा अरहओ अरिद्वणेमिस्स अंतिए मुंडा जाव पव्वइत्तए । अहासुहं देवाणुप्पिया! मा पडिबंधं करेहि ।

तए णं से कण्हे वासुदेवे कोडुंबियपुरिसे सद्धावेइ, सद्धावित्ता एवं वयासी-खिप्पामेव भो देवाणुप्पिया ! पउमावईए महत्थं णिक्खमणाभिसेयं उवडुवेह, उवडुवित्ता एयमाणत्तियं पच्चप्पिणह । तए णं ते जाव पच्चप्पिणंति ।

९ तए णं से कण्हे वासुदेवे पउमावइं देविं पट्टयं दुरुहेइ, अट्ठसएणं सोवण्ण कलसाणं जाव महाणिक्खमणाभिसेएणं अभिसिंचइ, अभिसिंचित्ता सव्वालंकार विभूसियं करेइ, करेत्ता पुरिससहस्सवाहिणिं सिबियं दुरुहावेइ, दुरुहावेत्ता बारवईए णयरीए मज्झिमज्झेणं णिगच्छइ, णिग्गच्छित्ता जेणेव रेवयए पव्वए, जेणेव सहसंबवणे उज्जाणे तेणेव उवागच्छित्ता सीयं ठवेइ "पउमावइं देविं" सीयाओ पच्चोरुहइ, पच्चोरुहित्ता जेणेव अरहा अरिद्वणेमी तेणेव उवागच्छइ, उवागच्छित्ता अरहं अरिद्वणेमिं तिक्खुत्तो आयाहिणं पयाहिणं करेइ, करेत्ता वंदइ णमंसइ, वंदित्ता णमंसित्ता एवं वयासी-

एस णं भंते ! मम अग्गमहिंसी पउमावई णामं देवी इट्ठा कंता पिया मणुण्णा मणाभिरामा जीवियऊसासा हिययाणंदजणिया, उंबरपुप्फं पिव दुल्लहा सवणयाए किमंग पुण पासणयाए ? तण्णं अहं देवाणुप्पिया ! सिस्सिणिभिक्खं दलयामि । पडिच्छंतु णं देवाणुप्पिया! सिस्सिणिभिक्खं । अहासुहं देवाणुप्पिया! मा पडिबंधं करेह ।

१० तए णं सा पउमावई उत्तरपुरत्थिमं दिसीभागं अवक्कमइ, अवक्कमित्ता, सयमेव आभरणालंकारं ओमुयइ, ओमुयित्ता सयमेवं पंचमुट्ठियं लोयं करेइ, करेत्ता जेणेव अरहा अरिद्वणेमी तेणेव उवागच्छइ, उवागच्छित्ता अरहं अरिद्वणेमिं वंदइ णमंसइ, वंदित्ता णमंसित्ता एवं वयासी- आलित्ते जाव तं इच्छामि णं देवाणुप्पिएहिं धम्ममाइक्खियं ।

तए णं अरहा अरिद्वणेमी पउमावइं देविं सयमेव पव्वावेइ पव्वावेत्ता सयमेव जक्खिणीए अज्जाए सिस्सिणित्ताए दलयइ । तए णं सा जक्खिणी अज्जा पउमावइं देविं सयमेव जाव

संजमियव्वं । तए णं सा पउमावई अज्जा जाया- इरियासमिया भासासमिया एसणासमिया आयाण-भंड-मत्त- णिक्खेवणासमिया उच्चार पासवण-खेल-सिंघाण-जल्ल-पारिद्वावणियासमिया मणसमिया वइसमिया कायसमिया मणगुत्ता वइगुत्ता कायगुत्ता गुत्ता गुत्तिंदिया गुत्तबंभयारिणी ।

तए णं सा पउमावई अज्जा जक्खिणीए अज्जाए अंतिए सामाइयमाइयाइं एकारस अंगाइं अहिज्जइ, बहूहिं चउत्थ छट्ठम-दसम-दुवालसेहिं मासद्धमास- खमणेहिं विविहेहिं तवोकम्महिं अप्पाणं भावेमाणी विहरइ ।

तए णं सा पउमावई अज्जा बहुपडिपुण्णाइं वीसं वासाइं सामण्णपरियागं पाउणइ, पाउणित्ता मासियाए संलेहणाए अप्पाणं झूसेइ, झूसेत्ता सट्ठि भत्ताइं अणसणाए छेदेइ, छेदित्ता जस्सट्ठाए कीरइ णग्गभावे जाव तमट्ठं आराहेइ, चरिमुस्सासेहिं सिद्धा ।

॥ पढम अज्झयणं समत्तं ॥

पंचमं वग्गो

२-१० अज्झयणाणि

गोरिपभिइ

१ तेणं कालेणं तेणं समएणं बारवई णयरी । रेवयए पव्वए । उज्जाणे णंदणवणे । तत्थ णं बारवईए णयरीए कणहे वासुदेवे । तस्स णं कणहस्स वासुदेवस्स गोरी देवी, वण्णओ । अरहा समोसडे । कणहे णिग्गए । गोरी जहा पउमावई तहा णिग्गया । धम्मकहा । परिसा पडिगया । कणहे वि । तए णं सा गोरी जहा पउमावई तहा णिक्खंता जाव सिद्धा । एवं गंधारी, लक्खणा, सुसीमा, जंबवई, सच्चभामा, रुपिणी, अट्ठवि पउमावईसरिसयाओ, अट्ठ अज्झयणा ।

॥ पंचमं वग्गो समत्तो ॥

१ तेणं कालेणं तेणं समएणं बारवई णयरीए, रेवयए पव्वए, णंदणवणे उज्जाणे, कणहे वासुदेवे । तत्थ णं बारवईए णयरीए कणहस्स वासुदेवस्स पुत्ते जंबवईए देवीए अत्तए संबे णामं कुमारे होत्था- अहीणपडि- पुण्णपंचिंदियसरीरे । तस्स णं संबस्स कुमारस्स मूलसिरी णामं भज्जा होत्था, वण्णओ । अरहा समोसडे कणहे णिग्गए । मूलसिरी वि णिग्गया, जहा पउमावई । जं णवरं देवाणुप्पिया ! कण्हं वासुदेवं आपुच्छामि जाव सिद्धा । एवं मूलदत्ता वि ।

छट्टो वग्गो

१-२ अज्झयणाणि

मकाई-किंकमे

- १ जइ णं भंते ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं पंचमस्स वग्गस्स अयमट्ठे पण्णत्ते, छट्ठस्स णं भंते ! वग्गस्स के अट्ठे पण्णत्ते ?
एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं छट्ठस्स वग्गस्स सोलस अज्झयणा पण्णत्ता, तं जहा-
मकाइ, किंकमे चेव, मोगगरपाणी य, कासवे ।
खेमए, धिइधरे, चेव, केलासे, हरिचंदणे ॥१॥
वारत्त, सुदंसण, पुण्णभद्व तह, सुमणभद्व, सुपइट्ठे ।
मेहे, अइमुत्त, अलक्के, अज्झयणाणं तु सोलसयं ॥२॥
जइ सोलस अज्झयणा पण्णत्ता, पढमस्स णं भंते ! अज्झयणस्स के अट्ठे पण्णत्ते ?
एवं खलु जंबू ! तेणं कालेणं तेणं समएणं रायगिहे णयरे । गुणसिलए चेइए । सेणिए राया ।
तत्थ णं मकाई णामं गाहावई परिवसइ । अट्ठे जाव अपरिभूए ।
- २ तेणं कालेणं तेणं समएणं भगवं महावीरे गुणसिलए चेइए अहापडिरूवं उग्गहं उग्गिण्हइ,
उग्गिण्हिता संजमेणं तवसा अप्पाणं भावेमाणे विहरइ । परिसा णिग्गया । तए णं से मकाई
गाहावई इमीसे कहाए लद्धट्ठे जहा पण्णत्तीए गंगदत्ते तहेव इमो वि जेइपुत्तं कुडुंबे ठवेत्ता
पुरिससहस्सवाहिणीए सीयाए णिक्खंते जाव अणगारे जाए- इरियासमिए जाव गुत्तबंभयारी ।
- ३ तए णं से मकाई अणगारे समणस्स भगवओ महावीरस्स तहारूवाणं थेराणं अंतिए सामाइयमाइयाइं
एक्कारस अंगाइं अहिज्जइ । सेसं जहा खंदयस्स गुणरयणं तवोकम्मं सोलसवासाइं परियाओ ।
तहेव विउले सिद्धे ।
किंकमे वि एवं चेव जाव विउले सिद्धे ।

॥ पढमं, बीअं अज्झयणं समत्तं ॥

छट्टो वग्गो

तइअं अज्झयणं

मोगगरपाणी

- १ तेणं कालेणं तेणं समएणं रायगिहे णयरे । गुणसीलए चेइए । सेणिए राया । चेलणा देवी ।
तत्थ णं रायगिहे णयरे अज्जुणए णामं मालागारे परिवसइ । अट्ठे जाव अपरिभूए । तस्स णं
अज्जुणयस्स मालागारस्स बंधुमई णामं भारिया होत्था । सुकुमालपाणिपाया । तस्स णं
अज्जुणयस्स मालायारस्स रायगिहस्स णयरस्स बहिया, एत्थं णं महं एगे पुप्फारामे होत्था-

किण्हे जाव महामेह णिउरंभभूए दसद्ववण्ण कुसुमकुसुमिए पासाईए दरिसणिज्जे अभिरूवे पडिरूवे ।

तस्स णं पुप्फारामस्स अदूरसामंते, एत्थ णं अज्जुणयस्स मालायारस्स अज्जय- पज्जय- पिडपज्जयागए अणेगकुलपुरिस-परंपरागए मोगगरपाणिस्स जक्खस्स जक्खा-ययणे होत्था-पोराणे दिव्वे सच्चे जहा पुण्णभद्वे । तत्थ णं मोगगरपाणिस्स पडिमा एगं महं पलसहस्सणिप्फण्णं अओमयं मोगगरं गहाय चिद्वइ ।

२

तए णं से अज्जुणए मालागारे बालप्पभिइं चेव मोगगरपाणि जक्खभत्ते यावि होत्था । कल्लाकल्लिं पच्छियपिडगाइं गेण्हइ गेण्हित्ता रायगिहाओ णयराओ पडिणिक्खमइ, पडिणिक्खमित्ता जेणेव पुप्फारामे तेणेव उवागच्छइ, उवागच्छित्ता पुप्फुच्चयं करेइ, करेत्ता अग्गाइं वराइं पुप्फाइं गहाय, जेणेव मोगगरपाणिस्स जक्खस्स जक्खाययणे तेणेव उवागच्छइ, उवागच्छित्ता मोगगरपाणिस्स जक्खस्स महरिहं पुप्फच्चणं करेइ, करेत्ता जाणुपायपडिए पणामं करेइ, तओ पच्छा रायमग्गंसि वित्तिं कप्पेमाणे विहरइ ।

३

तत्थ णं रायगिहे णयरे ललिया णामं गोढी परिवसइ-अड्ढा जाव अपरिभूया जं कयसुकया यावि होत्था ।

तए णं रायगिहे णयरे अण्णया कयाइ पमोदे घुट्ठे यावि होत्था । तए णं से अज्जुणए मालागारे कल्लं पभूयतराएहिं पुप्फेहिं कज्जं इति कट्ठु पच्चूसकालसमयंसि बंधुमईए भारियाए सद्धिं पच्छिपिडयाइं गेण्हइ, गेण्हित्ता सयाओ गिहाओ पडिणिक्खमइ, पडिणिक्खमित्ता रायगिहं णयरं मज्झंमज्झेणं णिग्गच्छइ, णिग्गच्छित्ता जेणेव पुप्फारामे तेणेव उवागच्छइ, उवागच्छित्ता बंधुमईए भारियाए सद्धिं पुप्फच्चयं करेइ । तए णं तीसे ललियाए गोढीए छ गोढिल्ला पुरिसा जेणेव मोगगरपाणिस्स जक्खस्स जक्खाययणे तेणेव उवागया अभिरममाणा चिद्वंति ।

४

तए णं अज्जुणए मालागारे बंधुमईए भारियाए सद्धिं पुप्फुच्चयं करेइ पच्छिपिडगाइं भरेइ, भरेत्ता अग्गाइं वराइं पुप्फाइं गहाय जेणेव मोगगरपाणिस्स जक्खस्स जक्खाययणे तेणेव उवागच्छइ । तए णं ते छ गोढिल्ला पुरिसा अज्जुणयं मालागारं बंधुमईए भारियाए सद्धिं एज्जमाणं पासंति, पासित्ता अण्णमण्णं एवं वयासी-

एस णं देवाणुप्पिया ! अज्जुणए मालागारे बंधुमईए भारियाए सद्धिं इहं हव्वमागच्छइ । तं सेयं खलु देवाणुप्पिया ! अम्हं अज्जुणयं मालागारं अवओडय- बंधणयं करेत्ता बंधुमईए भारियाए सद्धिं विउलाइं भोगभोगाइं भुंजमाणाणं विहरित्तए त्ति कट्ठु, एयमद्वं अण्णमण्णस्स पडिसुणेंति, पडिसुणेत्ता कवाडंतरेसु णिलुक्कंति, णिच्चला, णिप्फंदा, तुसिणीया, पच्छण्णा चिद्वंति । तए णं से अज्जुणए मालागारे बंधुमईए भारियाए सद्धिं जेणेव मोगगरपाणिस्स जक्खस्स जक्खाययणे तेणेव उवागच्छइ, आलोए पणामं करेइ, महरिहं पुप्फच्चणं करेइ, जण्णुपायपडिए पणामं करेइ । तए णं छ गोढिल्ला पुरिसा दवदवस्स कवाडंतरेहिंतो णिग्गच्छंति णिग्गच्छित्ता अज्जुणयं मालागारं गेण्हंति, गेण्हित्ता अवओडयबंधणं करेंति । बंधुमईए मालागारीए सद्धिं विउलाइं भोगभोगाइं भुंजमाणा विहरंति ।

५

तए णं तस्स अज्जुणयस्स मालागारस्स अयमज्झत्थिए जाव समुप्पज्जित्था- एवं खलु अहं बालप्पभिइं चेव मोग्गरपाणिस्स भगवओ कल्लाकल्लिं जाव पुप्फच्चणं करेमि, जण्णुपायपडिए पणामं करेमि तओ पच्छा रायमग्गंसि वित्तिं कप्पेमाणे विहरामि । तं जइ णं मोग्गरपाणि जक्खे इह सण्णिहिए होंते, से णं किं मम एयारूवं आवइं पावेज्जमाणं पासंते ? तं णत्थि णं मोग्गरपाणि जक्खे इह सण्णिहिए । सुव्वत्तं णं एस कट्ठे । तए णं से मोग्गरपाणी जक्खे अज्जुणयस्स मालागारस्स अयमेयारूवं अज्झत्थियं जाव वियाणेत्ता अज्जुणयस्स मालागारस्स सरीरयं अणुप्पविसइ, अणुप्पविसित्ता तडतडस्स बंधाइं छिंदइ, छिंदित्ता तं पलसहस्सणिप्फण्णं अओमयं मोग्गरं गेण्हइ, गेण्हित्ता ते इत्थिसत्तमे छ पुरिसे घाएइ ।

तए णं से अज्जुणए मालागारे मोग्गरपाणिणा जक्खेणं अण्णाइट्ठे समाणे रायगिहस्स णयरस्स परिपेरंतेणं कल्लाकल्लिं इत्थिसत्तमे छ पुरिसे घाएमाणे घाएमाणे विहरइ ।

६

तए णं रायगिहे णयरे सिंघाडग तिग-चउक्क-चच्चर-चउम्महु महापहपहेसु बहुजणो अण्णमण्णस्स एवमाइक्खइ एवं भासेइ एवं पण्णवेइ एवं परूवेइ-एवं खलु देवाणुप्पिया ! अज्जुणए मालागारे मोग्गरपाणिणा अण्णाइट्ठे समाणे रायगिहे णयरे बहिया इत्थिसत्तमे छ पुरिसे घाएमाणे घाएमाणे विहरइ ।

तए णं से सेणिए राया इमीसे कहाए लद्धट्ठे समाणे कोडुंबियपुरिसे सद्दावेइ, सद्दावेत्ता एवं वयासी- एवं खलु देवाणुप्पिया ! अज्जुणए मालागारे जाव घाएमाणे घाएमाणे विहरइ । तं मा णं तुब्भे केइ कट्ठस्स वा तणस्स वा पाणियस्स वा पुप्फफलाणं वा अट्ठाए सइरं णिग्गछह । मा णं तस्स सरीरयस्स वावत्ती भविस्सइ त्ति कट्ठु दोच्चं पि तच्चं पि घोसणयं घोसेह, घोसेत्ता खिप्पामेव ममेयं आणत्तियं पच्चप्पिणह । तए णं से कोडुंबियपुरिसा जाव पच्चप्पिणंति ।

७

तत्थ णं रायगिहे णयरे सुदंसणे णामं सेट्ठी परिवसइ-अइट्ठे जाव अपरिभूए । तए णं से सुदंसणे समणोवासए यावि होत्था-अभिगयजीवाजीवे उवलद्ध-पुण्णपावे, आसव-संवर-णिज्जर-किरियाहिगरण-बंध-मोक्खकुसले, असहेज्जदेवा-सुर-णाग-सुवण्ण-जक्ख-रक्खस किण्णर-किंपुरिस- गरुल-गंधव्व-महोरगाइएहिं देवगणेहिं णिग्गंथाओ पावयणाओ अणइक्क- मणिज्जे, णिग्गंथे पावयणे णिस्संकिए णिक्कंखिए णिव्वित्तिगिच्छे, लद्धट्ठे, गहियट्ठे, पुच्छियट्ठे, अहिगयट्ठे, विणिच्छियट्ठे, अट्ठिमिंज पेमाणुरागरत्ते । अयमाउसो ! णिग्गंथे पावयणे अट्ठे, अयं परमट्ठे, सेसे अणट्ठे, उसियफलिहे अवंगुयदुवारे, चियत्तंतेउर परघरदारप्पवेसे, बहुहिं सीलव्वय-गुणवेरमण-पच्चक्खाण- पोसहोप-वासेहिं चाउद्धस्सइमु-द्धिद्वपुण्णमासिणीसु पडिपुण्णं पोसहं सम्मं अणुपालेमाणे समणे णिग्गंथे फासुएसणिज्जेणं असण पाण-खाइम-साइमेणं वत्थ-पडिग्गह-कंबल- पायपुंछणेणं पीढ-फलग- सिज्जा-संथारएणं ओसह- भेसज्जेण य पडिलाभेमाणे अहापरिग्गहि- एहिं तवोकम्महिं अप्पाणं भावेमाणे विहरइ ।

८

तेणं कालेणं तेणं समएणं समणे भगवं महावीरे समोसडे जाव अप्पाणं भावेमाणे विहरइ । तएणं रायगिहे णयरे सिंघाडग जाव महापहेसु बहुजणो अण्णमण्णस्स एवमाइक्खइ एवं भासइ, एवं पण्णवेइ, एवं परूवेइ- एवं खलु देवाणुप्पिया ! समणे भगवं महावीरे, आइगरे तित्थयरे सयंसंबुद्धे, पुरिसुत्तमे जाव संपाविउकामे, पुव्वाणुपुव्विं चरमाणे, गामाणुगामं दूइज्जमाणे इहमागए, इह संपत्ते, इह समोसडे; इहेव रायगिहे णयरे बाहिं गुणसिलए चेइए अहापडिरूवं उग्गहं

उग्गिण्हित्ता संजमेणं तवसा अप्पाणं भावेमाणे विहरइ । तं महप्फलं खलु भो देवाणुप्पिया ! तहारूपाणं अरहंताणं भगवंताणं णामगोयस्स वि सवणयाए; किमंग पुण अभिगमण-वंदण-णमंसण-पडिपुच्छण-पज्जुवासणयाए ? एगस्स वि आयरियस्स धम्मियस्स सुवयणस्स सवणयाए; किमंग पुण विउलस्स अत्थस्स गहणयाए ?

९ तए णं तस्स सुदंसणस्स बहुजणस्स अंतिए एवं अट्ठं सोच्चा णिसम्म अयं अज्झत्थिए चिंतिए पत्थिए मणोगए संकप्पे समुप्पज्जित्था- एवं खलु समणे भगवं महावीरे जाव विहरइ । तं गच्छामि णं समणं भगवं महावीरं वंदामि णमंसामि; एवं संपेहेइ, संपेहेत्ता जेणेव अम्मापियरो तेणेव उवागच्छइ, उवागच्छित्ता करयल परिग्गहियं जाव एवं वयासी-

एवं खलु अम्मयाओ ! समणे भगवं महावीरे जाव विहरइ । तं गच्छामि णं समणं भगवं महावीरं वंदामि णमंसामि सक्कारेमि सम्माणेमि कल्लाणं मंगलं देवयं चेइयं पज्जुवासामि ।

१० तए णं सुदंसणे सेट्ठिं अम्मापियरो एवं वयासी- एवं खलु पुत्ता ! अज्जुणए मालागारे जाव घाएमाणे-घाएमाणे विहरइ । तं मा णं तुमं पुत्ता ! समणं भगवं महावीरं वंदए णिग्गच्छाहि, मा णं तव सरीरयस्स वावत्ती भविस्सइ । तुमण्णं इहगए चेव समणं भगवं महावीरं वंदहि । तए णं से सुदंसणे सेट्ठी अम्मापियरं एवं वयासी- किण्णं अहं अम्मयाओ ! समणं भगवं महावीरं इहमागयं, इह पत्तं, इह समोसढं, इह गए चेव वंदिस्सामि णमंसिस्सामि ? तं गच्छामि णं अहं अम्मयाओ ! तुब्भेहिं अब्भणुण्णाए समाणे समणं भगवं महावीरं वंदामि णमंसामि जाव पज्जुवासामि ।

तए णं सुदंसणं सेट्ठिं अम्मापियरो जाहे णो संचारंति बहूहिं आघवणाहिं जाव परूवेत्तए ताहे एवं वयासी- अहासुहं देवाणुप्पिया !

११ तए णं से सुदंसणे अम्मापिईहिं अब्भणुण्णाए समाणे ण्हाए सुद्धप्पावेसाइं मंगलाइं वत्थाइं पवरपरिहिए अप्पमहग्घाभरणालंकिय सरीरे सयाओ गिहाओ पडिणिक्खमइ, पडिणिक्खमित्ता पायविहारचारेणं रायगिहं णयरं मज्झिमज्झेणं णिग्गच्छइ, णिग्गच्छित्ता मोग्गरपाणिस्स जक्खस्स जक्खाययणस्स अदूरसामंतेणं जेणेव गुणसिलए चेइए जेणेव समणे भगवं महावीरे तेणेव पहारेत्थ गमणाए ।

१२ तए णं से मोग्गरपाणी जक्खे सुदंसणं समणोवासयं अदूरसामंतेणं वीईवयमाणं-वीईवयमाणं पासइ, पासित्ता, आसुरुत्ते रुट्ठे कुविए चंडिक्किए मिसिमिसेमाणे तं पलसहस्सणिप्फण्णं अओमयं मोग्गरं उल्लालेमाणे-उल्लालेमाणे जेणेव सुदंसणे समणोवासए तेणेव पहारेत्थ गमणाए । तए णं से सुदंसणे समणोवासए मोग्गरपाणिं जक्खं एज्जमाणं पासइ, पासित्ता अभीए अतत्थे अणुत्विग्गे अक्खुभिए अचलिए असंभंते वत्थंतेणं भूमिं पमज्जइ, पमज्जित्ता करयलपरिग्गहियं दसणहं सिरसावत्तं मत्थए अंजलिं कट्ठु एवं वयासी-

णमोत्थुणं अरहंताणं भगवंताणं जाव संपत्ताणं । णमोत्थुणं समणस्स भगवओ महावीरस्स आइगरस्स तित्थयरस्स जाव संपाविउकामस्स । पुत्विं पि णं मए समणस्स भगवओ महावीरस्स अंतिए थूलए पाणाइवाए पच्चक्खाए जावज्जीवाए थूलए मुसावाए पच्चक्खाए जावज्जीवाए, थूलए अदिण्णादाणे पच्चक्खाए जावज्जीवाए, सदारसंतोसे कए जावज्जीवाए, इच्छापरिमाणे कए जावज्जीवाए । तं इदाणिं पि णं तस्सेव अंतियं सव्वं पाणाइवायं पच्चक्खामि

जावज्जीवाए, सव्वं मुसावायं, अदत्तादाणं, मेहुणं, परिग्गहं पच्चक्खामि जावज्जीवाए, सव्वं कोहं माणं मायं लोहं पेज्जं दोसं कलहं अब्भक्खाणं पेसुणं परपरिवायं अरइरइं मायामोसं मिच्छादंसणसल्लं पच्चक्खामि जावज्जी- वाए । सव्वं असणं पाणं खाइमं साइमं चउविहंपि आहारं पच्चक्खामि जावज्जीवाए । जइ णं एत्तो उवसग्गाओ मुच्चिस्सामि तो मे कप्पइ पारित्तए । अह णं एत्तो उवसग्गाओ ण मुच्चिस्सामि 'तो मे तहा' पच्चक्खाए चेव त्ति कट्ठु सागारं पडिमं पडिवज्जइ ।

तए णं से मोग्गरपाणी जक्खे तं पलसहस्सणिप्फणं अओमयं मोग्गरं उल्लालेमाणे- उल्लालेमाणे जेणेव सुदंसणे समणोवासए तेणेव उवागए । णो चेव णं संचाएइ सुदंसणं समणोवासयं तेयसा समभिपडित्तए ।

१३ तए णं से मोग्गरपाणि जक्खे सुदंसणं समणोवासयं सव्वओ समंता परिघोलेमाणे परिघोलेमाणे जाहे णो चेव णं संचाएइ सुदंसणं समणोवासयं तेयसा समभिपडित्तए, ताहे सुदंसणस्स समणोवासयस्स पुरओ सपक्खिं सपडिदिसिं ठिच्चा सुदंसणं समणोवासयं अणिमिसाए दिट्ठीए सुचिरं णिरिक्खइ, णिरिक्खित्ता अज्जुणयस्स मालागारस्स सरीरं विप्पजहइ, विप्पजहित्ता तं पलसहस्सणिप्फणं अओमयं मोग्गरं गहाय जामेव दिसं पाउब्भूए तामेव दिसं पडिगए ।

तए णं से अज्जुणए मालागारे मोग्गरपाणिणा जक्खेणं विप्पमुक्के समाणे 'धस' त्ति धरणियलंसि सव्वंगेहिं णिवडिए । तए णं से सुदंसणे समणोवासए णिरुवसग्गमित्ति कट्ठु पडिमं पारेइ ।

१४ तए णं से अज्जुणए मालागारे तत्तो मुहुत्तंतरेणं आसत्थे समाणे उट्ठेइ, उट्ठित्ता सुदंसणं समणोवासयं एवं वयासी- तुब्भे णं देवाणुप्पिया ! के, कहिं वा संपत्थिया? तए णं सुदंसणे समणोवासए अज्जुणयं मालागारं एवं वयासी- एवं खलु देवाणुप्पिया ! अहं सुदंसणे णामं समणोवासए अभिगयजीवाजीवे गुणसिलए चेइए समणं भगवं महावीरं वंदए संपत्थिए ।

तए णं से अज्जुणए मालागारे सुदंसणं समणोवासयं एवं वयासी- तं इच्छामि णं देवाणुप्पिया! अहमवि तुमए सद्धिं समणं भगवं महावीरं वंदित्तए णमंसित्तए सक्कारित्तए सम्माणित्तए कल्लाणं मंगलं देवयं चेइयं पज्जुवा- सित्तए । अहासुहं देवाणुप्पिया ! मा पडिबंधं करेहि ।

१५ तए णं सुदंसणे समणोवासए अज्जुणएणं मालागारेणं सद्धिं जेणेव गुणसिलए चेइए, जेणेव समणे भगवं महावीरे तेणेव उवागच्छइ, उवागच्छित्ता अज्जुणएणं मालागारेणं सद्धिं समणं भगवं महावीरं तिक्खुत्तो आयाहिणं पयाहिणं करेइ करेत्ता वंदइ णमंसइ, वंदित्ता णमंसित्ता तिविहाए पज्जुवासणाए पज्जुवासइ । तं जहा- काइयाए वाइयाए माणसियाए । काइयाए ताव संकुइयग्गहत्यपाए णच्चासण्णे णाइदूरे सुस्सूसमाणे णमंसमाणे अभिमुहे विणएणं पंजलिउडे पज्जुवासइ । वाइयाए जं जं भगवं वागरेइ, एवमेयं भंते! तहमेयं भंते ! अवितहमेयं भंते ! असंदिद्धमेयं भंते ! इच्छियमेयं भंते ! पडिच्छियमेयं भंते ! इच्छिय-पडिच्छियमेयं भंते ! से जहेयं तुब्भे वयह अपडिकूलमाणे पज्जुवासइ । माणसियाए महया संवेगं जणइत्ता तिव्वधम्मणुरागरत्तो पज्जुवासइ ।

तए णं समणे भगवं महावीरे सुदंसणस्स समणोवासगस्स अज्जुणयस्स मालागारस्स तीसे य महइमहालियाए परिसाए मज्झगए विचित्तं धम्ममाइक्खइ। सुदंसणे पडिगए ।

१६ तए णं से अज्जुणए मालागारे समणस्स भगवओ महावीरस्स अंतिए धम्मं सोच्चा णिसम्म हट्ठुट्ठे समणं भगवं महावीरं तिक्खुत्तो आयाहिणं पयाहिणं करेइ, करेत्ता वंदइ णमंसइ, वंदित्ता णमंसित्ता एवं वयासी- सद्वहामि णं भंते ! णिग्गंथं पावयणं जाव अब्भुट्ठेमि णं भंते ! णिग्गंथं पावयणं ।

अहासुहं देवाणुप्पिया ! मा पडिबंथं करेहि ।

तए णं से अज्जुणए मालागारे उत्तरपुरत्थिमं दिसीभागं अवक्कमइ, अवक्कमित्ता सयमेव पंचमुट्ठियं लोयं करेइ, करेत्ता जाव अणगारे जाए जाव एवं च णं विहरइ ।

तए णं से अज्जुणए अणगारे जं चेव दिवसं मुंडे जाव पव्वइए तं चेव दिवसं समणं भगवं महावीरं वंदइ, णमंसइ, वंदित्ता णमंसित्ता इमं एयारूवं अभिग्गहं ओगेण्हइ-कप्पइ मे जावज्जीवाए छट्ठंछट्ठेणं अणिक्खित्तेणं तवोक्कमेणं अप्पाणं भावेमाणस्स विहरित्तए त्ति कट्ठु अयमेयारूवं अभिग्गहं ओगेण्हइ, ओगेण्हित्ता जावज्जीवाए जाव विहरइ ।

तए णं से अज्जुणए अणगारे छट्ठक्खमणपारणयंसि पढमाए पोरिसीए सज्झायं करेइ जाव अडइ ।

१७ तए णं तं अज्जुणयं अणगारं रायगिहे णयरे उच्च णीय-मज्झिमाइं कुलाइं घरसमुदाणस्स भिक्खायरियाए अडमाणं बहवे इत्थीओ य पुरिसा य डहरा य महल्ला य जुवाणा य एवं वयासी-

इमेण मे पिया मारिए । इमेण मे माया मारिया । इमेण मे भाया भगिणी भज्जा पुत्ते धूया सुण्हा मारिया । इमेण मे अण्णयरे सयण संबंधि परियणे मारिए त्ति कट्ठु अप्पेगइया अक्कोसंति, अप्पेगइया हीलंति णिंदंति खिंसंति गरिहंति तज्जंति तालेंति ।

तए णं से अज्जुणए अणगारे तेहिं बहूहिं इत्थीहि य पुरिसेहि य डहरेहि य महल्लेहि य जुवाणएहि य आओसिज्जमाणे जाव तालेज्जमाणे तेसिं मणसा वि अपउस्समाणे सम्मं सहइ सम्मं खमइ सम्मं तितिक्खइ सम्मं अहियासेइ, सम्मं सहमाणे सम्मं खममाणे सम्मं तितिक्खमाणे सम्मं अहियासेमाणे रायगिहे णयरे उच्च-णीय-मज्झिम कुलाइं अडमाणे जइ भत्तं लभइ तो पाणं न लभइ, अह पाणं लभइ तो भत्तं ण लभइ ।

१८ तए णं से अज्जुणए अणगारे अदीणे अविमणे अकलुसे अणाइले अविसादी अपरितंतजोगी अडइ, अडित्ता रायगिहाओ णयराओ पडिणिक्खमइ, पडिणिक्ख- मित्ता जेणेव गुणसिलए चेइए, जेणेव समणे भगवं महावीरे तेणेव उवागच्छइ, उवागच्छित्ता समणस्स भगवओ महावीरस्स अदूरसामंते गमणागमणाए पडिक्कमेइ, पडिक्कमेत्ता एसणमणेसणं आलोएइ, आलोएत्ता भत्तपाणं पडिदंसेइ, पडिदंसेत्ता समणेणं भगवया महावीरेणं अब्भणुण्णाए समाणे अमुच्छिए अगिद्धे अगट्ठिए अणज्झोववण्णे बिलमिव पण्णगभूएणं अप्पाणेणं तमाहारं आहारेइ । तए णं समणे भगवं महावीरे अण्णया रायगिहाओ पडिणिक्खमइ, पडिणिक्खमित्ता बहिया जणवयविहारं विहरइ ।

तए णं से अज्जुणए अणगारे तेणं ओरालेणं विउलेणं पयत्तेणं पग्गहिएणं महानुभागेणं तवोक्कमेणं अप्पाणं भावेमाणे बहुपडिपुण्णे छम्मासे सामण्णपरियागं पाउणइ, पाउणित्ता

अद्धमासियाए संलेहणाए अप्पाणं झूसेइ, झूसेत्ता तीसं भत्ताइं अणसणाए छेदेइ, छेदेत्ता जस्सद्वाए कीरइ णग्गभावे जाव सिद्धे ।

॥ तइअं अज्झयणं समत्तं ॥

छट्ठो वग्गो

४-१४ अज्झयणाणि

कासवादि

१ तेणं कालेणं तेणं समएणं रायगिहे णयरे, गुणसिलए चेइए । सेणिए राया, कासवे णामं गाहावई परिवसइ । जहा मकाई । सोलस वासा परियाओ । विपुले सिद्धे ।
एवं खेमए वि गाहावई, णवरं कायंदी णयरी । सोलस वासा परियाओ । विपुले पव्वए सिद्धे ।
एवं धिइहरे वि गाहावई कायंदीए णयरीए । सोलस वासा परियाओ । विपुले सिद्धे ।
एवं केलासे वि गाहावई, णवरं साए णयरे । बारस वासाइं परियाओ । विपुले सिद्धे ।
एवं हरिचंदणे वि गाहावई साए णयरे । बारस वासा परियाओ विपुले सिद्धे ।
एवं वारत्तए वि गाहावई, णवरं रायगिहे णयरे । बारस वासा परियाओ । विपुले सिद्धे ।
एवं सुदंसणे वि गाहावई, णवरं वाणियग्गामे णयरे । दुइपलासए चेइए । पंच वासा परियाओ । विपुले सिद्धे ।
एवं पुण्णभद्धे वि गाहावई वाणियग्गामे णयरे । पंच वासा परियाओ । विपुले सिद्धे ।
एवं सुमणभद्धे वि गाहावई णवरं सावत्थीए णयरीए । बहुवासाइं परियाओ । विपुले सिद्धे ।
एवं सुपइट्ठे वि गाहावई सावत्थीए णयरीए । सत्तावीसं वासा परियाओ । विपुले सिद्धे ।
एवं मेहे वि गाहावई, णवरं रायगिहे णयरे । बहूइं वासाइं परियाओ । विपुले सिद्धे ।

॥ ४-१४ अज्झयणाणि समत्ताणि ॥

छट्ठो वग्गो

पण्णरसमं अज्झयणं

अइमुत्तेकुमारे

१ तेणं कालेणं तेणं समएणं पोलासपुरे णयरे । सिरिवणे उज्जाणे । तत्थ णं पोलासपुरे णयरे विजए णामं राया होत्था । तस्स णं विजयस्स रण्णो सिरी णामं देवी होत्था, वण्णओ । तस्स णं विजयस्स रण्णो पुत्ते सिरिए देवीए अत्तए अइमुत्ते णामं कुमारे होत्था, सुकुमालपाणिपाए ।

तेणं कालेणं तेणं समएणं समणे भगवं महावीरे जाव सिरिवणे उज्जाणे जाव विहरइ ।

तेणं कालेणं तेणं समएणं समणस्स भगवओ महावीरस्स जेठ्ठे अंतेवासी इंदभूई अणगारे जहा पण्णत्तीए जाव पोलासपुरे णयरे उच्च-णीय-मज्झिमाइं कुलाइं घरसमुदाणस्स भिक्खारियं अडइ ।

इमं च णं अइमुत्ते कुमारे णहाए जाव सव्वालंकारविभूसिए बहूहिं दारगेहि य दारियाहि य डिंभएहि य डिंभियाहि य कुमारएहि य कुमारियाहि य सद्धिं संपरिवुडे साओ गिहाओ पडिणिक्खमइ, पडिणिक्खमित्ता जेणेव इंदद्धाणे तेणेव उवागए तेहिं बहूहिं दारएहि य संपरिवुडे अभिरममाणे-अभिरममाणे विहरइ । तए णं भगवं गोयमे जाव भिक्खारियं अडमाणे इंदद्धाणस्स अदूरसामंतेणं वीईवयइ ।

२

तए णं से अइमुत्ते कुमारे भगवं गोयमं अदूरसामंतेणं वीईवयमाणं पासइ, पासित्ता जेणेव भगवं गोयमे तेणेव उवागए, भगवं गोयमं एवं वयासी- के णं भंते ! तुब्भे ? किं वा अडह ? तए णं भंते गोयमे अइमुत्तं कुमारं एवं वयासी- अम्हे णं देवाणुप्पिया ! समणा णिग्गंथा इरियासमिया जाव गुत्तबंभयारी जाव भिक्खारियाए अडामो ।

तए णं अइमुत्ते कुमारे भगवं गोयमं एवं वयासी- एह णं भंते ! तुब्भे जा णं अहं तुब्भं भिक्खं दवावेमि त्ति कट्ठु भगवं गोयमं अंगुलीए गेण्हइ, गेण्हित्ता जेणेव सए गिहे तेणेव उवागए । तए णं सा सिरिदेवी भगवं गोयमं एज्जमाणं पासइ, पासित्ता हट्ठुत्ता आसणाओ अब्भुट्ठेइ, अब्भुट्ठेत्ता जेणेव भगवं गोयमे तेणेव उवागया । भगवं गोयमं तिक्खुत्तो आयाहिणं-पयाहिणं करेइ, करेत्ता वंदइ णमंसइ, वंदित्ता णमंसित्ता विउलेणं असण- पाण- खाइम-साइमेणं पडिलाभेइ, पडिलाभेत्ता पडिविसज्जेइ ।

तए णं से अइमुत्ते कुमारे भगवं गोयमं एवं वयासी- कहि णं भंते ! तुब्भे परिवसह ? तए णं से भगवं गोयमे अइमुत्तं कुमारं एवं वयासी- एवं खलु देवाणुप्पिया ! मम धम्मयारिए धम्मोवदेसए समणे भगवं महावीरे आइगरे जाव संपाविउकामे इहेव पोलासपुरस्स णयरस्स बहिया सिरिवणे उज्जाणे अहापडिरूवं ओग्गहं ओगिण्हित्ता संजमेणं तवसा अप्पाणं भावेमाणे विहरइ । तत्थ णं अम्हे परिवसामो ।

३

तए णं से अइमुत्ते कुमारे भगवं गोयमं एवं वयासी- गच्छामि णं भंते ! अहं तुब्भेहिं सद्धिं समणं भगवं महावीरं पायवंदए । अहासुहं देवाणुप्पिया ! मा पडिबंधं करेहि ।

तए णं से अइमुत्ते कुमारे भगवया गोयमेणं सद्धिं जेणेव समणे भगवं महावीरे तेणेव उवागच्छइ, उवागच्छित्ता समणं भगवं महावीरं तिक्खुत्तो आयाहिण पयाहिणं करेइ, करेत्ता वंदइ जाव पज्जुवासइ ।

तए णं भगवं गोयमे जेणेव समणे भगवं महावीरे तेणेव उवागए जाव भत्तपाणं पडिदंसेइ, पडिदंसेत्ता संजमेणं तवसा अप्पाणं भावेमाणे विहरइ । तए णं समणे भगवं महावीरे अइमुत्तस्स कुमारस्स तीसे य महइ महालियाए परिसाए मज्झगए विचित्तं धम्ममाइक्खइ ।

४

तए णं से अइमुत्ते कुमारे समणस्स भगवओ महावीरस्स अंतिए धम्मं सोच्या णिसम्म हट्ठुत्ते जाव जं णवरं-देवाणुप्पिया ! अम्मापियरो आपुच्छामि तए णं अहं देवाणुप्पियाणं अंतिए जाव पव्वयामि । अहासुहं देवाणुप्पिया ! मा पडिबंधं करेहि ।

तए णं से अइमुत्ते कुमारे जेणेव अम्मापियरो तेणेव उवागए, उवागच्छित्ता अम्मापिऊणं पायवडणं करेइ, करेत्ता एवं वयासी- एवं खलु अम्मयाओ ! मए समणस्स भगवओ महावीरस्स अंतिए धम्मं णिसंते, से वि य मे धम्मं इच्छिए पडिच्छिए अभिरुइए । तए णं तस्स अइमुत्तस्स अम्मापियरो एवं वयासी- धण्णो सि तुमं जाया ! संपुण्णो सि तुमं जाया ! कयत्थो सि तुमं जाया ! जं णं तुमे समणस्स भगवओ महावीरस्स अंतिए धम्मं णिसंते, से वि य ते धम्मं इच्छिए पडिच्छिए अभिरुइए ।

तए णं से अइमुत्ते कुमारे अम्मापियरो दोच्चं पि तच्चं पि एवं वयासी-एवं खलु अम्मयाओ ! मए समणस्स भगवओ महावीरस्स अंतिए धम्मं णिसंते। से वि य णं मे धम्मं इच्छिए, पडिच्छिए, अभिरुइए । तं इच्छामि णं अम्मयाओ! तुब्भेहि अब्भणुण्णाए समाणे समणस्स भगवओ महावीरस्स अंतिए मुंडे भवित्ता णं अगाराओ अणगारियं पव्वइत्तए ।

५

तए णं तं अइमुत्तं कुमारं अम्मापियरो एवं वयासी- बाले सि ताव तुमं पुत्ता ! असंबुद्धे, कि णं तुमं जाणसि धम्मं ?

तए णं से अइमुत्ते कुमारे अम्मापियरो एवं वयासी- एवं खलु अहं अम्मयाओ! जं चेव जाणामि तं चेव ण जाणामि, जं चेव ण जाणामि तं चेव जाणामि ।

तए णं तं अइमुत्तं कुमारं अम्मापियरो एवं वयासी-कहं णं तुमं पुत्ता ! जं चेव जाणसि तं चेव ण जाणसि ? जं चेव ण जाणसि तं चेव जाणसि ?

तए णं से अइमुत्ते कुमारे अम्मापियरो एवं वयासी- जाणामि अहं अम्मयाओ! जहा जाएणं अवस्स मरियव्वं, ण जाणामि अहं अम्मयाओ ! काहे वा कहिं वा कहं वा कियच्चिरेण वा ? ण जाणामि णं अम्मयाओ ! केहिं कम्माययणेहिं जीवा णेरइय तिरिक्ख जोणियमणुस्सदेवेसु उववज्जंति, जाणामि णं अम्मयाओ ! जहा सएहिं कम्माययणेहिं जीवा णेरइय जाव उववज्जंति । एवं खलु अहं अम्मयाओ ! जं चेव जाणामि तं चेव ण जाणामि, जं चेव ण जाणामि तं चेव जाणामि । तं इच्छामो णं अम्मयाओ! तुब्भेहिं अब्भणुण्णाए जाव पव्वत्तए।

६

तए णं तं अइमुत्तं कुमारं अम्मापियरो जाहे णो संचाएंति बहूहिं आघवणाहिं जाव तं इच्छामो ते जाया ! एगदिवसमवि रायसिरिं पासेत्तए । तए णं से अइमुत्ते कुमारे अम्मापिउवयण मणुयत्तमाणे तुसिणीए संचिद्धइ । अभिसेओ जहा महा- बलस्स । णिक्खमणं जाव सामाइयमाइयाइं एक्कारस अंगाइं अहिज्जइ । बहूहिं वासाइं सामण्णपरियागं पाउणइ, गुणरयणं तवोकम्मं जाव विपुले सिद्धे ।

॥ पण्णरसमं अज्झयणं समत्तं ॥

छट्ठो वग्गो

सोलसमं अज्झयणं

अलक्के

१

तेणं कालेणं तेणं समएणं वाणारसी णयरी, काममहावणे चेइए । तत्थ णं वाराणसीए अलक्के णामं राया होत्था ।

तेणं कालेणं तेणं समएणं समणे भगवं महावीरे जाव विहरइ । परिसा णिग्गया । तए णं अलक्के राया इमीसे कहाए लद्धे हट्ठुत्ते जहा कोणिए जाव धम्मकहा । तए णं से अलक्के राया समणस्स भगवओ महावीरस्स अंतिए जहा उदायणे तहा णिक्खंते, णवरं जेठुपुत्तं रज्जे अभिसिंचइ । एक्कारस अंगाइं । बहू वासा परियाओ जाव विपुले सिद्धे । एवं खलु जंबू ! समणेणं भगवया महावीरेणं जाव संपत्तेणं अट्ठमस्स अंगस्स अंतगडदसाणं छट्ठस्स वग्गस्स अयमट्ठे पण्णत्ते ।

॥ छट्ठो वग्गो समत्तो ॥

सत्तमो वग्गो

१-१३ अज्झयणाणि

णंदादि

१

जइ णं भंते ! समणेणं भगवया महावीरेणं अट्ठमस्स अंगस्स अंतगड- दसाणं छट्ठस्स वग्गस्स अयमट्ठे पण्णत्ते, सत्तमस्स वग्गस्स के अट्ठे पण्णत्ते ?

एवं खलु जंबू ! समणेणं भगवया महावीरेणं अट्ठमस्स अंगस्स अंतगडदसाणं सत्तमस्स वग्गस्स तेरस अज्झयणा पण्णत्ता, तं जहा-

णंदा तह णंदवई, णंदुत्तर णंदिसेणिया चेव ।

मरुता सुमरुता महामरुता, मरुदेवा य अट्ठमा ॥१॥

भद्दा य सुभद्दा य, सुजाया सुमणाइया ।

भूयदिण्णा य बोधव्वा, सेणिय भज्जाण णामाइं ॥२॥

जइ णं भंते ! समणेणं भगवया महावीरेणं अट्ठमस्स अंगस्स अंतगडदसाणं सत्तमस्स वग्गस्स तेरस अज्झयणा पण्णत्ता, पढमस्स णं भंते ! अज्झयणस्स के अट्ठे पण्णत्ते ?

एवं खलु जंबू ! तेणं कालेणं तेणं समएणं रायगिहे णयरे । गुणसिलए चेइए । सेणिए राया, वण्णओ । तस्स णं सेणियस्स रण्णो णंदा णामं देवी होत्था, वण्णओ । सामी समोसढे, परिसा णिग्गया । तए णं सा णंदा देवी इमीसे कहाए लद्धवा हट्ठुत्ता कोडुंबियपुरिसे सद्दावेइ, सद्दावेत्ता जाणं दुरुहइ । जहा पउमावई जाव एकारस अंगाइ अहिज्जित्ता वीसं वासाइं परियाओ जाव सिद्धा ।

एवं तेरस वि देवीओ णंदा-गमेण णेयव्वाओ ।

॥ सत्तमो वग्गो समत्तो ॥

अट्टमो वग्गो

पढमं अज्झयणं

काली

१

जइ णं भंते ! समणेणं भगवया महावीरेणं अट्टमस्स अंगस्स अंतगड- दसाणं सत्तमस्स वग्गस्स अयमद्वे पण्णत्ते, अट्टमस्स वग्गस्स के अद्वे पण्णत्ते ?

एवं खलु जंबू ! समणेणं भगवया महावीरेणं अट्टमस्स अंगस्स अंतगडदसाणं अट्टमस्स वग्गस्स दस अज्झयणा पण्णत्ता तं जहा-

काली, सुकाली, महाकाली, कण्हा, सुकण्हा, महाकण्हा ।

वीरकण्हा य बोधव्वा, रामकण्हा तहेव य ।

पिउसेणकण्हा णवमी दसमी, महासेणकण्हा य ॥

जइ णं भंते ! समणेणं भगवया महावीरेणं अट्टमस्स अंगस्स अंतगडदसाणं दस अज्झयणा पण्णत्ता, पढमस्स णं भंते ! अज्झयणस्स के अद्वे पण्णत्ते ?

एवं खलु जंबू ! तेणं कालेणं तेण समणेणं चंपा णामं णयरी होत्था । पुण्णभद्वे चेइए । तत्थ णं चंपाए णयरीए कोणिए राया, वण्णओ । तत्थ णं चंपाए णयरीए सेणियस्स रण्णो भज्जा, कोणियस्स रण्णो चुल्लमाउया, काली णामं देवी होत्था, वण्णओ । जहा णंदा जाव सामाइयमाइयाइं एक्कारस अंगाइं अहिज्जइ । बहूहिं चउत्थ जाव अप्पाणं भावेमाणे विहरइ ।

२

तए णं सा काली अज्जा अण्णया कयाइ जेणेव अज्जचंदणा अज्जा तेणेव उवागया, उवागच्छित्ता एवं वयासी- इच्छामि णं अज्जाओ ! तुब्भेहिं अब्भणुण्णाया समाणी रयणावलिं तवं उवसंपज्जित्ता णं विहरित्तए । अहासुहं देवाणुप्पिए ! मा पडिबंधं करेहि ।

तए णं सा काली अज्जा अज्जचंदणाए अब्भणुण्णाया समाणी रयणावलिं तवं उवसंपज्जित्ता णं विहरइ तं जहा-

चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
अट्ट छट्ठाइं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
अट्ठारसमं	करेइ,	करेत्ता	सव्वकामगुणियं	पारेइ	पारेत्ता,

वीसइमं	करेइ,	करेत्ता	सव्वकामगुणियं	पारेइ	पारेत्ता,
बावीसइमं	करेइ,	करेत्ता	सव्वकामगुणियं	पारेइ	पारेत्ता,
चउवीसइमं	करेइ,	करेत्ता	सव्वकामगुणियं	पारेइ	पारेत्ता,
छव्वीसइमं	करेइ,	करेत्ता	सव्वकामगुणियं	पारेइ	पारेत्ता,
अट्ठावीसइमं	करेइ,	करेत्ता	सव्वकामगुणियं	पारेइ	पारेत्ता,
तीसइमं	करेइ,	करेत्ता	सव्वकामगुणियं	पारेइ	पारेत्ता,
बत्तीसइमं	करेइ,	करेत्ता	सव्वकामगुणियं	पारेइ	पारेत्ता,
चोत्तीसइमं	करेइ,	करेत्ता	सव्वकामगुणियं	पारेइ	पारेत्ता,
चोत्तीसं छट्ठाइं	करेइ,	करेत्ता	सव्वकामगुणियं	पारेइ	पारेत्ता,
चोत्तीसइमं	करेइ,	करेत्ता	सव्वकामगुणियं	पारेइ	पारेत्ता,
बत्तीसइमं	करेइ,	करेत्ता	सव्वकामगुणियं	पारेइ	पारेत्ता,
तीसइमं	करेइ,	करेत्ता	सव्वकामगुणियं	पारेइ	पारेत्ता,
अट्ठावीसइमं	करेइ,	करेत्ता	सव्वकामगुणियं	पारेइ	पारेत्ता,
छव्वीसइमं	करेइ,	करेत्ता	सव्वकामगुणियं	पारेइ	पारेत्ता,
चउवीसइमं	करेइ,	करेत्ता	सव्वकामगुणियं	पारेइ	पारेत्ता,
बावीसइमं	करेइ,	करेत्ता	सव्वकामगुणियं	पारेइ	पारेत्ता,
वीसइमं	करेइ,	करेत्ता	सव्वकामगुणियं	पारेइ	पारेत्ता,
अट्ठारसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
चोदसमं	करेइ,	करेत्ता	सव्वकामगुणियं	पारेइ	पारेत्ता,
बारसमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
अट्ठमं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
अट्ठ छट्ठाइं	करेइ,	करेत्ता	सव्वकामगुणियं	पारेइ	पारेत्ता,
अट्ठमं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,

एवं खलु एसा रयणावलीए तवोकम्मस्स पढमा परिवाडी एगेणं संवच्छरेणं तिहिं मासेहिं बावीसाए य अहोरत्तेहिं अहासुत्तं अहाअत्थं अहातच्चं अहामग्गं अहाकप्पं सम्मं काएणं फासिया पालिया सोहिया तीरिया किट्टिया आराहिया भवइ ।

३

तयाणंतंरं च णं दोच्चाए परिवाडीए चउत्थं करेइ, करेत्ता विगइवज्जं पारेइ पारेत्ता, छट्ठं करेइ, करेत्ता विगइवज्जं पारेइ । एवं जहा पढमाए परिवाडीए तहा बीयाए वि, णवरं- सव्वपारणए

विगडवज्जं पारेइ । एवं खलु एसा रयणावलीए तवोक्कम्मस्स बिइया परिवाडी एगेणं संवच्छरेणं तिहिं मासेहिं बावीसाए य अहोरत्तेहिं जाव आराहिया भवइ ।

तयाणंतं च णं तच्चाए परिवाडीए चउत्थं करेइ, करेत्ता अलेवाडं पारेइ । सेसं तहेव । णवरं अलेवाडं पारेइ । एवं चउत्था परिवाडी । णवरं सव्वपारणए आयंबिलं पारेइ । सेसं तं चेव ।

पढमम्मि सव्वकामं, पारणयं बिइयए विगडवज्जं ।

तइयम्मि अलेवाडं, आयंबिलओ चउत्थम्मि ॥१॥

तए णं सा काली अज्जा रयणावलीतवोक्कम्मं पंचहिं संवच्छरेहिं दोहि य मासेहिं अट्ठावीसाए य दिवसेहिं अहासुत्तं जाव आराहेत्ता जेणेव अज्जचंदणा अज्जा तेणेव उवागच्छइ, उवागच्छित्ता अज्जचंदणं अज्जं वंदइ णमंसइ, वंदित्ता णमंसित्ता बहूहिं चउत्थ-छट्ठम-दसम-दुवालसेहिं तवोक्कम्मेहिं अप्पाणं भावेमाणी विहरइ ।

४

तए णं सा काली अज्जा तेणं उरालेणं विउलेणं पयत्तेणं पग्गहिणं कल्लाणेणं सिवेणं धण्णेणं मंगलेणं सस्सिरीएणं उदग्गेणं उदत्तेणं उत्तमेणं उदारेणं महाणुभागेणं तवोक्कम्मेणं सुक्का लुक्खा णिम्मंसा अट्ठिचम्मावणद्धा किडिकिडिया भूया किंसा धमणिसंतया जाया यावि होत्था । से जहा इंगालसगडी वा उण्हे दिण्णा सुक्का समाणी ससद्धं गच्छइ, ससद्धं चिट्ठइ, एवामेव कालीए वि अज्जा ससद्धं गच्छइ, ससद्धं चिट्ठइ, उवचिए तवेणं अवचिए मंस-सोणिणं सुहुयहुयासणे इव भासरासिपलिच्छण्णा तवेणं तेणं, तवतेयसिरीए अईव-अईव उवसोहेमाणी उवसोहेमाणी चिट्ठइ ।

५

तए णं तीसे कालीए अज्जाए अण्णया कयाइं पुव्वरत्ता वरत्तकाले अयमज्झत्थिए चित्तिए पत्थिए मणोगए संकप्पे समुप्पज्जित्था, जहा खंदयस्स चिंता जाव अत्थि उट्ठाणे कम्मे बले वीरिए पुरिसक्कार-परक्कमे सद्धा धिई संवेगे तावता मे सेयं कल्लं जाव जलंते अज्जचंदणं अज्जं आपुच्छित्ता अज्जचंदणाए अज्जाए अब्भणुण्णाए समाणीए संलेहणा झूसणा झूसियाए भत्तपाण पडियाइक्खियाए कालं अणव-कंखमाणीए विहरित्तए त्ति कट्ठु एवं संपेहेइ, संपेहेत्ता कल्लं जेणेव अज्जचंदणा अज्जा तेणेव उवागच्छइ, उवागच्छित्ता अज्जचंदणं अज्जं वंदइ णमंसइ, वंदित्ता णमंसित्ता एवं वयासी- इच्छामि णं अज्जो ! तुब्भेहिं अब्भणुण्णाया समाणी संलेहणा जाव विहरित्तए । अहासुहं ।

६

तए णं सा काली अज्जा अज्जचंदणाए अब्भणुण्णाया समाणी संलेहणा झूसणा झूसिया जाव विहरइ । तए णं सा काली अज्जा अज्जचंदणाए अंतिए सामाइयमाइयाइं एक्कारस अंगाइं अहिज्जित्ता बहुपडिपुण्णाइं अट्ठ संवच्छराइं सामण्णपरियागं पाउणित्ता, मासियाए संलेहणाए अत्ताणं झूसित्ता, सद्धिं भत्ताइं अणसणाए छेदित्ता, जस्सट्ठाए कीरइ णग्गभावे जाव चरिमुस्सासेहिं सिद्धा । णिक्खेवओ ।

॥ पढमं अज्झयणं समत्तं ॥

अट्टमो वग्गो

बीअं अज्झयणं

सुकाली

१

तेणं कालेणं तेणं समएणं चंपा णामं णयरी । पुण्णभद्धे चेइए । कोणिए राया । तत्थ णं
सेणियस्स रण्णो भज्जा, कोणियस्स रण्णो, चुल्लमाउया सुकाली णामं देवी होत्था । जहा
काली तहा सुकाली वि णिक्खंता जाव तवोकम्महिं अप्पाणं भावेमाणी विहरइ ।
तए णं सा सुकाली अज्जा अण्णया कयाइं जेणेव अज्जचंदणा जाव इच्छामि णं अज्जाओ !
तुब्भेहिं अब्भणुण्णाया समाणी कणगावली तवोकम्मं उव- संपज्जित्ताणं विहरित्तए । एवं जहा
रयणावली तहा कणगावली वि, णवरं- तिसु ठाणेसु अट्टमाइं करेइ, जहिं रयणावलीए छट्ठाइं ।
एक्काए परिवाडीए संवच्छरो, पंच मासा, बारस य अहोरत्ता । चउण्हं पंच वरिसा णव मासा
अट्टारस दिवसा । सेसं तहेव । णव वासा परियाओ जाव सिद्धा । णिक्खेवओ ।

॥ बीअं अज्झयणं समत्तं ॥

अट्टमो वग्गो

तइअं अज्झयणं

महाकाली

१

एवं महाकाली वि । णवरं खुड्डागसीहणिककीलियं तवोकम्मं उवसंपज्जित्ता णं विहरइ, तं
जहा-

चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
सौलसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,

अठारसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
वीसइमं	करेइ,	करेत्ता	सव्वकामगुणियं	पारेइ	पारेत्ता,
अठारसमं	करेइ,	करेत्ता	सव्वकामगुणियं	पारेइ	पारेत्ता,
वीसइमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
चोदसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
बारसमं	करेइ,	करेत्ता	सव्वकामगुणियं	पारेइ	पारेत्ता,
चोदसमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
बारसमं	करेइ,	करेत्ता	सव्वकामगुणियं	पारेइ	पारेत्ता,
अठ्ठमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अठ्ठमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ	करेत्ता	सव्वकामगुणियं	पारेइ	।

तहेव चत्तारि परिवाडीओ । एक्काए परिवाडीए छम्मासा सत्त य दिवसा । चउण्हं दो वरिसा अट्ठावीसा य दिवसा जाव सिद्धा । णिक्खेवओ ।

॥ तइअं अज्झयणं समत्तं ॥

अठ्ठमो वग्गो

चउत्थं अज्झयणं

कण्हा

१

एवं कण्हा वि णवरं महालयं सीहणिककीलियं तवोकम्मं, जहेव खुड्डागं । णवरं चोत्तीसइमं जाव णेयव्वं । तहेव ओसारेयव्वं । एक्काए वरिसं छम्मासा अठ्ठारस य दिवसा । चउण्हं छव्वरिसा दो मासा बारस य अहोरत्ता । सेसं जहा कालीए जाव सिद्धा । णिक्खेवओ ।

॥ चउत्थं अज्झयणं समत्तं ॥

अट्टमो वग्गो

पंचमं अज्झयणं

सुकण्हा

१

एवं सुकण्हा वि, णवरं सत्तसत्तमियं भिक्खुपडिमं उवसंपज्जित्ताणं विहरइ ।
पढमे सत्तए एक्केक्कं भोयणस्स दत्तिं पडिगाहेइ, एक्केक्कं पाणयस्स ।
दोच्चे सत्तए दो-दो भोयणस्स दो-दो पाणयस्स पडिगाहेइ ।
तच्चे सत्तए तिण्णि-तिण्णि दत्तीओ भोयणस्स, तिण्णि-तिण्णि दत्तीओ पाणयस्स ।
चउत्थे सत्तए चत्तारि-चत्तारि दत्तीओ भोयणस्स, चत्तारि-चत्तारि दत्तीओ पाणयस्स ।
पंचमे सत्तए पंच-पंच दत्तीओ भोयणस्स, पंच-पंच दत्तीओ पाणयस्स ।
छट्ठे सत्तए छ-छ दत्तीओ भोयणस्स, छ-छ दत्तीओ पाणयस्स ।
सत्तमे सत्तए सत्त-सत्त दत्तीओ भोयणस्स, सत्त-सत्त दत्तीओ पाणयस्स पडिगाहेइ ।
एवं खलु एयं सत्तसत्तमियं भिक्खुपडिमं एगूणपण्णाए राइंदिएहिं एगेण य छण्णउएण
भिक्खासएणं अहासुत्तं जाव आराहेत्ता जेणेव अज्जचंदणा अज्जा तेणेव उवागया,
उवागच्छित्ता अज्जचंदणं अज्जं वंदइ णमंसइ, वंदित्ता णमंसित्ता एवं वयासी-
इच्छामि णं अज्जाओ ! तुब्भेहिं अब्भणुण्णाया समाणी अट्ठ अट्ठमियं भिक्खुपडिमं
उवसंपज्जित्ताणं विहरत्तए ।
अहासुहं देवाणुप्पिए ! मा पडिबंधं करेहि ।

२

तए णं सा सुकण्हा अज्जा अज्जचंदणाए अज्जाए अब्भणुण्णाया समाणी अट्ठमियं
भिक्खुपडिमं उवसंपज्जित्ता णं विहरइ-
पढमे अट्ठए एक्केक्कं भोयणस्स दत्तिं पडिगाहेइ, एक्केक्कं पाणयस्स जाव अट्ठमे अट्ठए अट्ठ
भोयणस्स पडिगाहेइ, अट्ठ पाणयस्स ।
एवं खलु एयं अट्ठमियं भिक्खुपडिमं चउसट्ठीए राइंदिएहिं दोहि य अट्ठासीएहिं भिक्खासएहिं
अहासुत्तं जाव आराहित्ता णवणवमियं भिक्खुपडिमं उवसंपज्जित्ताणं विहरइ-
पढमे णवए एक्केक्कं भोयणस्स दत्तिं पडिगाहेइ, एक्केक्कं पाणयस्स जाव णवमे णवमए णव-
णव दत्तीओ भोयणस्स पडिगाहेइ, णव-णव पाणयस्स ।
एवं खलु एयं णवणवमियं भिक्खुपडिमं एक्कासीतिए राइंदिएहिं, चउहि य पंचुत्तरेहिं
भिक्खासएहिं, अहासुत्तं जाव आराहेत्ता दसदसमियं भिक्खुपडिमं उवसंपज्जित्ता णं विहरइ-
पढमे दसए एक्केक्कं भोयणस्स दत्तिं पडिगाहेइ, एक्केक्कं पाणयस्स जाव दसमे दसए दस-
दस दत्तीओ भोयणस्स पडिगाहेइ, दस-दस पाणयस्स ।
एवं खलु एयं दसदसमियं भिक्खुपडिमं एक्केणं राइंदियसएणं अट्ठछट्ठेहिं य भिक्खासएहिं
अहासुत्तं जाव आराहेइ, आराहेत्ता बहूहिं चउत्थ-छट्ठम-दसम-दुवालसेहिं मासद्धमासखमणेहिं
विविहेहिं तवोकम्महिं अप्पाणं भावेमाणी विहरइ ।
तए णं सा सुकण्हा अज्जा तेणं ओरालेणं तवोकम्मेणं जाव सिद्धा । णिक्खेवओ ।

॥ पंचमं अज्झयणं समत्तं ॥

अट्टमो वग्गो

छट्ठं अज्झयणं

महाकण्हा

१

एवं महाकण्हा वि, णवरं-खुड्डागं सव्वओभद्वं पडिमं उवसंपज्जित्ताणं विहरइ, तं जहा-

चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्टमं	करेइ,	करेत्ता	सव्वकामगुणियं	पारेइ	पारेत्ता,

एवं खलु एयं खुड्डागसव्वओभद्वस्स तवोकम्मस्स पढमं परिवाडिं तिहिं मासेहिं दसहिं य दिवसेहिं अहासुत्तं जाव आराहेत्ता दोच्चाए परिवाडीए चउत्थं करेइ, करेत्ता विगइवज्जं पारेइ,

पारेत्ता जहा रयणावलीए तहा एत्थ वि चत्तारि परिवाडीओ । पारणा तहेव । चउण्हं कालो
संवच्छरो मासो दस य दिवसा । सेसं तहेव जाव सिद्धा । णिक्खेवओ ।

॥ छट्ठ अज्झयणं समत्तं ॥

अट्ठमो वग्गो

सत्तमं अज्झयणं

वीरकण्हा

१ एवं वीरकण्हा वि णवरं-महालयं सव्वओभद्धं तवोकम्मं उवसंपज्जित्ता णं विहरइ, तं जहा-

चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्ठमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता ॥ पढमा लया ॥
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,
सोलसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्ठमं	करेइ,	करेत्ता	सव्वकामगुणियं	पारेइ	पारेत्ता ॥ बीया लया ॥
सोलसमं	करेइ,	करेत्ता	सव्वकामगुणियं	पारेइ	पारेत्ता,
चउत्थं	करेइ,	करेत्ता	सव्वकामगुणियं	पारेइ	पारेत्ता,
छट्ठं	करेइ,	करेत्ता	सव्वकामगुणियं	पारेइ	पारेत्ता,
अट्ठमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता ॥ तइया लया ॥
अट्ठमं	करेइ,	करेत्ता	सव्वकामगुणियं	पारेइ	पारेत्ता,
दसमं	करेइ,	करेत्ता	सव्वकामगुणियं	पारेइ	पारेत्ता,
दुवालसमं	करेइ,	करेत्ता	सव्वकामगुणियं	पारेइ	पारेत्ता,
चोद्धसमं	करेइ,	करेत्ता	सव्वकामगुणियं	पारेइ	पारेत्ता,

सोलसमं	करेइ,	करेत्ता	सव्वकामगुणियं	पारेइ	पारेत्ता,	
चउत्थं	करेइ,	करेत्ता	सव्वकामगुणियं	पारेइ	पारेत्ता,	
छट्ठं	करेइ,	करेत्ता	सव्वकामगुणियं	पारेइ	पारेत्ता	॥ चउत्थी लया ॥
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
चउत्थं	करेइ,	करेत्ता	सव्वकामगुणियं	पारेइ	पारेत्ता,	
छट्ठं	करेइ,	करेत्ता	सव्वकामगुणियं	पारेइ	पारेत्ता,	
अट्ठमं	करेइ,	करेत्ता	सव्वकामगुणियं	पारेइ	पारेत्ता,	
दसमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ	पारेत्ता	॥ पंचमीलय ॥
छट्ठं	करेइ,	करेत्ता	सव्वकामगुणियं	पारेइ	पारेत्ता,	
अट्ठमं	करेइ,	करेत्ता	सव्वकामगुणियं	पारेइ	पारेत्ता,	
दसमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
चउत्थं	करेइ,	करेत्ता	सव्वकामगुणियं	पारेइ	पारेत्ता	॥ छट्ठी लया ॥
दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
चउत्थं	करेइ,	करेत्ता	सव्वकामगुणियं	पारेइ	पारेत्ता,	
छट्ठं	करेइ,	करेत्ता	सव्वकामगुणियं	पारेइ	पारेत्ता,	
अट्ठमं	करेइ,	करेत्ता	सव्वकामगुणियं	पारेइ	पारेत्ता,	
दसमं	करेइ,	करेत्ता	सव्वकामगुणियं	पारेइ		॥ सत्तमी लया ॥

एक्काए कालो अट्ठ मासा पंच य दिवसा । चउण्हं दो वासा अट्ठ मासा वीसं दिवसा । सेसं तहेव जाव सिद्धा । णिक्खेवओ ।

॥ सत्तमं अज्झयणं समत्तं ॥

अट्ठमो वग्गो

अट्ठमं अज्झयणं

रामकण्हा

१

एवं रामकण्हा वि, णवरं- भद्दोत्तर पडिमं उवसंपज्जित्ता णं विहरइ, तं जहा-

दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
अट्टारसमं	करेइ,	करेत्ता	सव्वकामगुणियं	पारेइ	पारेत्ता,	
वीसइमं	करेइ,	करेत्ता	सव्वकामगुणियं	पारेइ	पारेत्ता	॥ पढमा लया ॥
सोलसमं	करेइ,	करेत्ता	सव्वकामगुणियं	पारेइ	पारेत्ता,	
अट्टारसमं	करेइ,	करेत्ता	सव्वकामगुणियं	पारेइ	पारेत्ता,	
वीसइमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता	॥ बीया लया ॥
वीसइमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
अट्टारसमं	करेइ,	करेत्ता	सव्वकामगुणियं	पारेइ	पारेत्ता	॥ तइया लया ॥
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता,	
अट्टारसमं	करेइ,	करेत्ता	सव्वकामगुणियं	पारेइ	पारेत्ता,	
वीसइमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ		॥ चउत्थी लया ॥
अट्टारसमं	करेइ,	करेत्ता	सव्वकामगुणियं	पारेइ	पारेत्ता,	
वीसइमं	करेइ,	करेत्ता	सव्वकामगुणियं	पारेइ	पारेत्ता,	
दुवालसमं	करेइ,	करेत्ता	सव्वकामगुणियं	पारेइ	पारेत्ता,	
चोद्धसमं	करेइ,	करेत्ता	सव्वकामगुणियं	पारेइ	पारेत्ता,	
सोलसमं	करेइ,	करेत्ता	सव्वकामगुणियं	पारेइ	पारेत्ता	॥ पंचमी लया ॥

एक्काए कालो छम्मासा वीस य दिवसा । चउण्हं कालो दो वरिसा दो मासा वीस य दिवसा ।
सेसं तहेव जहा काली जाव सिद्धा । णिक्खेवओ ।

॥ अट्ठमं अज्झयणं समत्तं ॥

अट्ठमो वग्गो

णवमं अज्झयणं

पिउसेणकण्हा

१ एवं पिउसेणकण्हा वि, णवरं- मुत्तावल्लिं तवोकम्मं उवसंपज्जित्ता णं विहरइ, तं जहा-

[illegible]

एवं तहेव ओसारेइ जाव चउत्थं करेइ, करेत्ता सव्वकामगुणियं पारेइ ।

एक्काए कालो एक्कारस मासा पण्णरस य दिवसा । चउण्हं तिण्णि वरिसा दस य मासा । सेसं जाव सिद्धा । णिक्खेवओ ।

॥ णवमं अज्झयणं समत्तं ॥

अट्ठमो वग्गो

दसमं अज्झयणं

महासेणकण्हा

१

एवं महासेणकण्हा वि, णवरं आयंबिलवड्ढमाणं तवोकम्मं उवसंपज्जित्ता णं विहरइ, तं जहा-
आयंबिलं करेइ, करेत्ता चउत्थं करेइ करेत्ता,
बे आयंबिलाइं करेइ, करेत्ता चउत्थं करेइ करेत्ता,
तिण्णि आयंबिलाइं करेइ, करेत्ता चउत्थं करेइ करेत्ता,
चत्तारि आयंबिलाइं करेइ, करेत्ता चउत्थं करेइ करेत्ता,
पंच आयंबिलाइं करेइ, करेत्ता चउत्थं करेइ करेत्ता,
छ आयंबिलाइं करेइ, करेत्ता चउत्थं करेइ करेत्ता,
एक्कुत्तरियाइ वुड्ढीए आयंबिलाइं वुड्ढंति चउत्थंतरियाइं जाव आयंबिलसयं करेइ, करेत्ता
चउत्थं करेइ ।

तए णं सा महासेणकण्हा अज्जा आयंबिलवड्ढमाणं तवोकम्मं चोद्धसहिं वासेहिं तिहि य मासेहिं
वीसहि य अहोरत्तेहिं अहासुत्तं जाव आराहेत्ता जेणेव अज्जचंदणा अज्जा तेणेव उवागया,
उवागच्छित्ता वंदइ णमंसइ, वंदित्ता णमंसित्ता बहूहिं चउत्थं जाव भावेमाणी विहरइ । तए णं
सा महासेणकण्हा अज्जा तेणं ओरालेणं जाव तवेणं तेणं तवतेय सिरीए अईव-अईव
उवसोहेमाणी चिट्ठइ ।

२

तए णं तीसे महासेणकण्हाए अज्जाए अण्णया कयाइ पुव्वरत्तावरत्तकाले चिंता जहा खंदयस्स
जाव अज्जचंदणं अज्जं आपुच्छइ जाव (संलेहणा) कालं अणवकंखमाणी विहरइ ।

तए णं सा महासेणकण्हा अज्जा अज्जचंदणाए अज्जाए अंतिए सामाइयमाइयाइं एक्कारस
अंगाइं अहिज्जित्ता, बहुपडिपुण्णाइं सत्तरस वासाइं परियायं पालइत्ता, मासियाए संलेहणाए
अप्पाणं झूसित्ता, सट्ठिं भत्ताइं अणसणाए छेदित्ता जस्सट्ठाए कीरइ णग्गभावे जाव तमड्ढं
आराहेइ, आराहित्ता चरिमउस्सास णिस्सासेहिं सिद्धा ।

अट्ठ य वासा आई, एक्कोत्तरियाए जाव सत्तरस्स ।

एसो खलु परियाओ, सेणियभज्जाण णायव्वो ॥१॥

॥ दसमं अज्झयणं समत्तं ॥

॥ अट्ठमो वग्गो समत्तो ॥

परिसेसो

१

एवं खलु जंबू ! समणेणं भगवया महावीरेण जाव संपत्तेणं अट्ठमस्स अंगस्स अंतगडदसाणं अयमट्ठे पण्णत्ते ।

अंतगडदसाणं अंगस्स एगो सुयखंधो । अट्ठ वग्गा । अट्ठसु चेव दिवसेसु उद्दिस्सिज्जंति । तत्थ पढमबिइयवग्गे दस-दस उद्देसगा । तइयवग्गे तेरस उद्देसगा । चउत्थ-पंचमवग्गे दस-दस उद्देसगा । छट्ठवग्गे सोलस उद्देसगा । सत्तमवग्गे तेरस उद्देसगा । अट्ठमवग्गे दस उद्देसगा । सेसं जहा णायाधम्मकहाणं ।

॥अंतगडं सुत्तं समत्तं ॥

Published By:

GLOBAL JAIN AAGAM MISSION

Pawandham, Mahavir Nagar,
Kandivali (W), Mumbai - 400 067